

KIMYE KYA KUKWATAKANA

NE KIIYUKILO



Byepi mabaanga. Kejishuko ja kutanwa kuno bufuku buno, kabiji pa kwimana pa kino kifulo.

² Amiwa, lukeelo luno, pakwiya mukwakwa... Nafuminepo kuya na kulomba, na kupembelela pe Nkambo. Kabiji pa kwiya mu jishinda, Najikushikula ku—ku wamwingilo wapa waileshi, Mulongo Smith, mulongo wachiluluka (bushe anweba bonse mwajikumumvwa lukeelo luno nyi? Umo mwi anweba?) akwa ku, Naketekela mba ku Ohio. Muntu umo wambujile pe aye na mambo a kusapwila, kabiji waambile mba, “Mwafwainwa kushikula,” byonkabya.

³ Najikubazhimukatu na mutana, lukeelo luno. Kabiji aye wajikwambanga pa bubu byo bubena kuvula mu ntanda leelo, kabiji aye wajinga... Kabiji Nakuyako palutwe, pa kitesheni kikwabo, kabiji naiya na kumvwa kumukwabo. Kimye kyo Najikufika muno, Najingatu winengezha, monai kyajinga kimye kypawa kya kuuba mba ngiye kukipwilo, lukeelo luno byo Nakutwela mukachi. Nanchi, atweba tuji bingi najishuko ja kwikala muno bufuku buno, kabiji ne pa kwingila mwingilo wa Nkambo.

⁴ Kabiji pa kwamba pe Mulongo Neville, ne mbila juba jikwabo, ku yuwe inetu mucheche, nyenga yetu ao wafuma kwi atweba. Akyo kyajinga, atweba bonse twamuyuka, ke Nyenga Weaver. Kabiji pa kulanguluka pa yuwe mwanamulume kuno, kubatizhiwa bufuku buno; aye... Namubatizhe mu kizhiba kimye Amiwa... bamuletele kuno mu kipona kya mawilo. Aye wafwilenga, na kaasa, kabiji wajingatu wakwikala na bumi bokabwatu bufuku; badokotala bamukakelwe, wafwaijilwe kufwa lukeelo lwalondejilepo. Kabiji Nayile ku nzubo yanji ne kweseka kwisamba nanji pa lubuko lwa Bulesa, kabiji watwajijiletu na kubwezhapo kintutu kimo, “Amiwa kechi nafikilamo kuuba mba anweba mwiye mushi ya mutenge wami ne.” Aye waambile mba, “Amiwa—Amiwa kechi nafikilamo kyakuuba mba wamwingilo kwikala mu nzubo yami ne.” Waambile mba, “Amiwa ne ndengamambo.” Bino aye waambile mba, “Mwane, Amiwa kechi nakonsha kufwatu muyuwe musango ne.” Kabiji nanchi Grace Weber, uji kokwa, wansendele nkutwalako. Amiwa ponafikiletu, najinga wakoka kufumatu ku mpwijilo; kabiji konkakwa kimye kyo Namulombejilenga, ne kumutangila Binembelo, kabiji wapulukile. Nanchi, kechi wakonsheshe kusutula kuboko

kwaanji peulu ne, bino wakebelenga kwimuna muntu yense mu kuboko. Aye wajingatu . . . kintu kimo kyamwekele kwi aye.

⁵ Ponkapotu kimye kyo beimwinengatu mu maboko, Namwene kimwesho kyanji kasa abena kuya ku nzubo yaba nzoolo, ne kubwela. Naambile mba, “Kijitu bulongo, kisakwikalatu bulongo pano”; kabiji apo ke myaka eitiini yapitapo. Kabiji aye wajinga palutwe ya kaasa, kimye kyonse kye. Inge aye wafwile . . . Kechi wafwile na kaasa ne, wajinga na kikola kya muchima kyo kya mwipaile. Bamubikile ku okosijini; aye wafwile na kikola kya muchima.

⁶ Kabiji nanchi Najikulangulukanga, pa kupezhako bantu byoba kulupukanga, kabiji baimbilenga, *Ponkapo Yesu Waishile*. Abo ibyo byamwekele, Aye waishile na kupulusha bumi bwanji pa iye myaka eitiini yapitapo. Kabiji Nalangulukile mba, “Byokiji kyawama.” Awa mwanamukazhi kape kechi wayukile mba ubena kwikyubila muyewa musango ne. Nanchi, ne jikwabo, wafwajilwe kwikala. Bino kyajinga kyawama kwikala na lolwa lubaji kokwa, *Ponkapo Yesu Waishile*.

⁷ Pano kiji pacheche kasa kikyangye kufikila, Na—Naketekela, kutachikwa kwami kwa mpwijilo. Amiwa ngikala bingi na lubazhibazhi. Lukeelo luno, Najinga wazhobakana, Najikuya na—na kulumba. Kabiji Ami—Amiwa nji pa muzhi, konka kuno. Kisemi, ne batwajiletu ku Arizona, kabiji Amiwa . . . pakuuba mba baana babwele ku sukuulu. Kabiji amiwa na bwela kuno na—na kuuba nobe kukokoloka, kuya na kwipaya nyama na Mulongo Wood kabiji ne jibumba ja balongo kuno; kuya na kwipaya nyama, awe mulungu ubena kwiya. Atweba ntubena kuya ku Kentucky. Kabiji Najinga . . . ponafikiletu . . . Amiwa ponaishiletu kufika mute amba—amba Mrs. Weaver wafwa, kabiji kijitu bulongo kuuba mba Amiwa njikuno na mukwashe Mulongo Neville mu kyokya kijilo.

⁸ Kabiji Amiwa kechi ngeseka ku . . . Amiwa kechi ngeseka kwa—kwamba byavula pa kikye ne, mwayukatu, paji bantu babena kwijizhanya. Mambo, Nalanguluka mba, kintu kimo kyatamisha ke kumona umo—umo mwanamulume nangwa mwanamukazhi wijizhanyatu kimye kyonse. Amiwa kimye kyonse ndangulukatu mba, “Lesu, mfumyai ku kikye.” Mwamona, akya—akya kinekenya lwitabilo kimye kyonse, mwayukatu. Anweba mujitu—anweba mujitu . . . inge anweba—inge anweba . . . Nayuka mba byo baya nakukoma, umo mwi atweba, tukamonanga kintu kimo na kumweka kabiji kintu kimo kyamweka. Kabiji Nayuka mba atwa tubitu tucheche tukayangatu na kuvula, monka mouyila na kukoma, wafwainwatu kwi kyuuba. Bino Nalanguluka mba kintu kimo kyakila mukutama, ke kuuba mba Satana wamvika bulobo bumi bwa muntu umo: wijizhanya mwanamulume mukote nangwa mwanamukazhi mukote, mwamona. Na—Naketekela mba kechi Nakonsha kufika ku kyokyo kifulo ne.

Naketekela mba Nakonsha kwikisenda, binemenezhi byami, kabiji—kabiji ne kufika pa kifulo kyakuuba mba... Nakeba bumi bwami kumvwikwa na Lukumo lwakwa Lesa: Kwanji kukooka muchima, butekanye, mutende, bukimote, ne kuyulwa na Mupashi Wazhila.

⁹ Kabiji Amiwa... kintu kimo kya bintu biine abyo kimye kyonse bimanyika bumi bwami, ke musango wa lubazhibazhi. Inge Amiwa naikala wakooka bingi, nishi kine Ngikala wanemenwa bingi. Amiwa ngikala... ng'umvwa nobe kechi kujipo muntu nangwa umo watako muchima kwi obewa ne, mwayukatu, kabiji—kabiji bonsetu... Muji nakyoye, ne anweba. Kabiji Amiwa kyamweka nobe njinakoye kyabaya bingi, mwayukatu, kabiji kimye kimo kifika pa kipimo kiyatama bingi, kabiji Nakonsha kuuba... Ke kukatazhiwa mu milanguluko, kabiji akyo kyo kilengela kwikala nakyoye. Kabiji Amiwa mfika pa kifulo kimo bimye byavula, kukijishamo na byobya bimwesho byavula, mwamona, kiiya kyakwata amiwa. Amiwa tala pa muntu, Nalanguluka mba, "Akye ke kimwesho. Ine, ine, ine, kechi ikyo ne. Ee! Kechi ikyo nenyi?" Mwamona? Kabiji kechi wakonsha kuyuka kintu kifuma mu kikyoye ne. Nanchi pano—nanchi pano obewa—obewa ke ukumye. Pano ke ulanguluke mba, "Kyawama, obewa wi..." Nanchi wafumako ku lubaji lobe ne kwaamba mba, "Kyawama, pano, kika—kika kyo Nauba? Amiwa bano, Amiwa—Amiwa nji na myaka fifite kabiji kafwako kyo Namubila Nkambo ne; kabiji Amiwa—Amiwa mbena kukota. Kabiji kika...? Oo, ami." Nanchi pano watambulatu... kyo twatongolanga mba "ba bbulu." Anweba bamo baji pamo na myaka nobe ami vulukai kyo batelenga mba "ikalai na ba bbulu." Pop waambangapo pa kikyoye kabiji Nakumyanga mo kyalumbulwijiye, kabiji kine Nayuka moekitazhizhe. Nanchi pano, watatula kunyema mujoja jishinda, akyo kechi kijipo na kimo kya kine ne; ke obewatu, yobe wikiyuka. Monai, mwikiyuka anweba, ke obewatu ubena kuuba byobyo.

¹⁰ Nanchi Nakwesekanga kwizhindamina amiwa mwine pachechetu, kabiji ne kwinegezha na mambo a—a kushijika ku katamete ko Naketekela mba kubena kwiya katataka. Kabiji pano kupichila... Nafwainwa kuya ku New York ponkapanotu, kabiji Ami... ku mbung'eno iji konkakwa, ke kipekeni. Kabiji pano kuya ku Shreveport, ne kubwela kuya ku Phoenix. Kabiji pano kwiya kuzhokoloka ku muzhika... ku mupaka wakabeta ka bulenge wa United States. Kabiji pano babena kunengezha kuya mu byaalo bya bushiya bwa tulunga, lwa kutatulako katataka pa kupitatu bimye bitanshi bya mwaka, kapepo mu Kisaka, Mulombola, kiji nobe byonkabyo; kwakutatwila mu Stockholm nangwa Oslo, kabiji ne kuya mwaya ntanda, inge kyakonsheka palulwe lwendo.

¹¹ Kabiji pano Amiwa njitu pamuzhi, kasa mbena kukokoloka pacheche, pakuuba mba na bwela mu bututulu bwami kabiji

nobe kubwezhamo bulume. Kabiji ine Nkambo waswa, Amiwa nkabwela pa Mulungu ubena kwiya, kufuma ku Kentucky. Kabiji—kabiji inge kijitu bulongo, kyamutokela ku muchima Nkambo, ne Mulongo Neville inge wabula kusakamana ne; kyawama, Amiwa kesekatu kwikala na mpwijilo pa Mulungu ubena kwiya, inge—inge aye Nkambo waswa. Kabiji inge Aye waswa byonka Mulongo Neville byo akonsha kuswa, Amiwa—Amiwa kekalakonka. Ee mwane, Aye ujitu nobe... inge Aye ubena kuswa pa kikyeye byonka biji Mulongo Neville. Amiwa naketekela mba byokiji kwi Aye. Pano, monai, nanchi Nayuka mba Amiwa katatakatu, inge aye Nkambo ubena kuswa, Amiwa nsakuya kufuma kwi anweba mu kakimye kacheche.

¹² Kabiji Amiwa... mbila ichechetu, byo Natola kintu kicheche kiji pa muchima wami, nanchi Na—Na—Naumvwa nobe Nakeba kwi kyamba kwi anweba, mwamona, kabiji twakonsha kwikala mu lumvwang'ano lwabupopweshi pa kikyeye. Bino, Njina bicheche bya mu bibye, faivi nangwa sikisi abyo byaiya kwi amiwa mu moba acheche apitapo. Kabiji Naile, moba amo kuno, na kwipaya tubaluyeye kokwa. Kabiji Amiwa nya mungye, kabiji nsenda pezulu ne kipepala. Mwamona? Bino kimye inge kyafikila kyamweka kuwama ne kyeya kyamute kyamweka, Amiwa shakamina ku kinchi kuntu kumo. Inge Nabula kuya na kulala, Ntatula kulomba, kabiji pano Amiwa, aye Nkambo upapo kintu kimo, Natatula kunemba bintu bimo bicheche bya byobyo, mwamona. Anweba mwayuka Amiwa monekitazha; inge wabwela mu bututulu bobo, kabiji nanchi obewa... Nanchi kuno inge Naiya, ne binembulula pa kipepala. Kabiji umvwe Naitwa, Amiwa nya nakutola kipepala kyami kabiji naya na kupitulukamo ipo pomona kyo Nakonsha kutatwilapo, mwamona. Aboyo byo kyaubilwe katataka.

¹³ Nanchi pano, Amiwa mbena kukeba, inge Nkambo waswa, kwambatu... Amiwa mbena kweseka kulenga... kwiachibako akatampe, mbila yalepa, mwamona; apo po kisenda maawala avula. Kabiji aye Nkambo wakwashishe kwingila mwingilo wawama waipipa ku Chicago, bufuku bwapeleleko kokwa, nobe mamineti sate. Kabiji muntu umo waishile, ne kwamba mba, "Amiwa kechi nalangulukile mba kiji mwi obewa ne, pakuuba wikyubile!" Nanchi mamineti sate, kufuma nobe pa maawala abiji na afu, nangwa asatu, mwayukatu. Nanchi kapepo Nakonsha kwendeshako bufuku buno kabiji ne kweseka kupitulukamo pacheche, kechi kwimulama kimye kyabaya ne.

¹⁴ Lesa emupeshe. Nangwa kwepi ko Nakonsha kuya, kechi kukekalapo kifulo kiji nobe uno tabbanako ne. Ke pa muzhi, muzhi wawama. Kabiji Amiwa naumvwinako lusa kisemi kyaba Weaver. Kabiji na yuwe mulongo wawama wachiluluka wafwile, Nalombele nanji pa kimye kicheche kasa akyangye kuya, kabiji wabyubilo byawama. Kabiji aye uji Kumuzhi ne Lesa ponkapano, kabiji kyapita. Kabiji nangwa byonkabyo

wafwainwa kuya, kabiji atweba bonse twayuka kyokyo. Nanchi atweba...lekai aye Nkambo akokoloshe myeo yabo mu mutende, kabiji juba jimo twaketekela mba tukakwatakana nabo muyoya Ntanda, amo mwabula misongo, bulanda, nangwa lufu. Poso kyokya kimye, twayai tube kyonse kyo twafwainwa kubila Mamboawama.

¹⁵ Kwamba pa mambo a kijikila, Amiwa naji kulombelelangapo lukeelo luno. Wakonsha kuuba byepi inge kijikila kechi uji naky o ne? Anweba ngikilangulukaitu. Kijikila ke lubaji lwa bwikalo. Aky kintu kyatundaikela byo Nekilangulukile. Inge kechi uji na kijikila ne, nishi uji nobe kisapi kyakala kya kadoli, kechi wakonsha kwikala na byakumvwa ku mubiji ne. Kechi wakonsha kwikala na kintu kyakwingijilapo ne. Kijitu pamo nobe mulume ne mukazhi, kapepo aye ubena kukeba kubapo kintu kimo, kabiji babena kweseka kwingijila pamo (kukijishamo Benakilishitu), kabiji mukwabo ubena kukeba...kabiji umvwe mwaiya pamo na kuuba...watana aye kyo auba; aye watana kuuba mba... Monai, kijikila kyabwela kimubwezha pamo pepipepi. Kabiji muntu umo wakubuula kyokyo mba, “Kyawama,” waambile mba, “langulukaitu mukazhobe wa mubiji mucheche ao wapichile mu kijikila kyabaya kimye kyowabujile kwikala bulongo,” nangwa “mulume wapichile mukijikila kimye kyo wabujile kwikala bulongo. Pano umvwe byonse byalekelwa mambo, monai mwaumwine byepi ku mubiji na mambo aaye. Ami, anweba mubatu...” Monai, wafwainwa kwikala na kijikila. Byo byonka.

¹⁶ Kabiji ngilangulukaitu, pa byakumvwa bya kumubiji, pano inge kechi muji nang’umwine ya ku mubiji ne, kafwako kumvwa kutata nangwa kiji kyonse ne? Pano inge kechi kujipo kumvwa kutata nangwa pachechetu ne? Kechi muji na byakumvwa ku mubiji ne. Mwamona? Kabiji umvwe kechi muji na ng’umvwinu ya ku mubiji ne, nanchi sesi wenu umo nishi waya. Mwamona? Nanchi, monai, bintu byonse bijitu bulongo nangwa byonkabyo. Nanchi, “Les a, witupeletu lusa lwa kwimana nakyo,” akyo kyo kintu. Inge twaimanatu na lolwa lusa, ne kwimana popa ne kwamba mba, “Atweba twayuka mba buno bumi inge bwapwa, mukatampe umo uji kulubaji lukwabo ako ko tubena kukeba mba tukaye.” Kabiji pano, atweba— atweba twavuluka mba abye byonse bintu, akyo kyo kijikila.

¹⁷ Kyakuuba mba, bantu bamo beseka kubulang’ana Bwinakilishitu, amba “obewa wakasuluka kubyakusakamana. Anweba byo muji...” Ine, kechi byo muji ne. “Obewa wakasuluka ku kijikila.” Oo, ine! Mubikapo kijikila inge mwaikala Benakilishitu, mambo wajinga nobe uya-kumatelo, wakasuluka-way a-washukwa, kyonse bikiji kokwa, kechi kutako muchima ku kyo mwaubile ne.

¹⁸ Pakuuba umvwe waikala Mwinakilishitu wakine, kimye kyonse ubena kukumyatu, “Bushe Amiwa mbena kusekesha Nkambo yami nyi? Inge Nakonsha kumvwa kufuma kwi Aye!” Kikubika pa kijikila, kikubika pa kwikikizha. Akyo kyo kikulengela kwikala byo uji. Nanchi pa byonse, kijikila ke jipesho. Kijitu jishinda jo ubena kwikimwenamo. Kijitu mujishinda jo ubena kwikimwenamo. Mwamona? Inge obewa umwenatu kulubaji lukwabo, kuji—kuji... Nangwatu wikachibe kacheche byepi, nangwa byonkabyo uji na mbaji ibiji ku kikyeye, mwamona. Nanchi ubena kukeba kumona mbaji yonse ibiji.

¹⁹ Nanchi kijikila... Nalanguluka mba, “Oo ami, kiji... Akye kijikila kyo kika? Inge Amiwa nasemekelwe kwakubula kijikila.” Kyawama, inge kechi Najinga na kikyeye kijikila ne, Amiwa inge kechi nji byonka Byoji ne. Amiwa inge kechi ne Mwinakilishitu ne, kapepo. Kyajinga kikyeye kijikila kyatwajile kwi Yesu Kilishitu. Mwamona? Nanchi, kyaikala ke kintu kyamapesho kwi amiwa.

²⁰ Pano nanchi, byonka byaambile Paulo, nobe byonka byo ajinga na kijikila nangwa kintu kikwabo nangwa kikwobotu, aye wamwipwizhe Nkambo amba—amba ekifumyepo pe aye bimye bisatu. Kabiji aye Nkambo waambile mba, “Saulo, Wami... Paulo, Lusa lwami lwavula pe obewa.”

²¹ Aye waambile mba, “Nanchi, amiwa kasekela mu bya kumanama byami. Nanchi umvwe Naikala wakoka, Amiwa ne wakosa.” Mwamona? Kikulutu kiji mukyaswa muchima wa Lesa, kijitu bulongo.

²² Bino, Namwipwizhe Aye kimye kimo apo pokyakatazhanganga bingi, kyandengelanga moyo. Kabiji Aye wambujile, pipe nobe myaka eiti nangwa teni yapitapo, Aye waambile mba, “Kechi kikakulengela moyo jibiji ne.” Kabiji kechi kyakibwelapo jibiji ne. Ine, mwane; kechi—kechi usakamane pa kikyeye ne. Amiwa ne kyumvwatu, bino Nayuka mba kijikonka; bino Amiwa ngyatu kulutwe mambo kechi kindengela moyo ne jikwabo ne, nasata bingi pakikyeye.

Pano, Aye wafwaijilwe kwamba mba, “Kechi kikabwelapo jibiji ne,” kijitu pamo nobe, “Obewa kechi ukomvwa moyo jibiji ne.”

²³ Nanchi ke kyaswa muchima Wanji amba kimwekenga, nanchi Nemitambulwilatu ne kwamba mba, “Nemusachila Anweba, Nkambo, Amiwa nkenda mujoja jishinda.”

²⁴ Pano, twayai tukunyike mitwe yetu pa kimye kichechetu mu—mu milombelo. Kujipo kukabila kwapusanako kwa milombelo? (Namona tutambala twalala papo.) Sutulai kuboko kwenu. Nkambo, peshai bonse bo baana Benu.

²⁵ Taata Wetu Wamwiulu, pano byo tubena kufwenya ku Jenu jikatampe, Jitanda ja lusa ja bumfumu, mambo mweitwipuzha

amba twiye. Tubena kwiya mambo Yesu Kilishitu witwita. Kabiji twaiya na byakukabila byetu byonse, ne kwibipana pe Aye mambo Aye wituta muchima. Ke lutekenesho lukatampe bingi, pa kuyuka mba Aye wituta muchima. Aye Lesa mukatampe wa Mwiulu, aye Mulenga, wituta muchima, bilengwa Byanji. Tuji bingi nalusekelo pa kikyeye, Nkambo. Lutekenesho lwabaya bibye mu bino bimye byo tubena kwikalamo, byo kyamweka mba kechi kujipo kukwabo kwa—kwa kufumya lutekenesho ne kanatu ku Kyambo Kyenu. Alwe lo lutekenesho lwetu, ke Mulaye Wenu. Kabiji mu Mulaye Wenu, Anweba mwaamba mba mpanai byakukabila byenu, kabiji “Inge mwaipuzha kintu kiji kyonse mu Jizhina Jami, Amiwa ke kyuba.” Kabiji yonse ye Milaye yenu ikatampe: “Lombai kabiji kikemupewa. Ambilai yuwe mutumba mba, ‘Mfuma papo,’ kabiji ne kuzhinauka ne, kabiji ukafumapo.” Yonse ye Milaye, kabiji twakonsha kufumya ku Bibye pa byobya byo tubena kulomba.

²⁶ Maboko aji kusutulwa, babena kukeba kintu kimo, Nkambo. Anweba mwayuka kukabila kwabo; panai, Taata. Nabika milombelo yami pamo nayabo kumeso Enu, maboko ami asutulwa pamo naabo. Apano paji pa yuwe desika, tutambala twaikala papo. Oo, nga bantu byo baji na lwitabilo, lwitabilo lukatampe, Nkambo. . . . Kyamwekatu nobe kintu kimo Anweba kyo mwapesha nakyo, pakuuba mba ndombebele bakolwa. Konsekonse, kuji konse, konse Amiwa nkongya, kikala kintu kya kulombelele bakolwa. Lesa, pano nkwashai. Amiwa nalomba na muchima wabukishika amba Anweba musakupana byakubila bya tutwe tutambala ato twaletwa kuno, monka mwaipwizha bantu. Lekai lusa Lwenu lwikale pe abo.

²⁷ Nkambo, twayuka mba Nyenga Hicks uji na mwanamukazhi papo, ao waletelwe nandeki kufuma kuntu kumo pakuuba mba alombelelewe, ku kaasa; kabiji wakebele kuyuka kana wakonsha kumuleta kuno. Nalomba, Lesa, amba Anweba mpulushai bumi bwa yuwe muntu; kiswishai. Mwipwa wami mucheche, Mikie, walala popa wakolwa ne kulasa, na mashika akatampe, walupukatu pa kibelo. Nkambo, Na—Naketekela mba twajinga na milombelo ya lwitabilo kokwa kyakuuba mba Anweba mwikilekesha, kabiji Ami—Ami—Ami nemusachila Anweba, pakumvwa mashika kasa abena kufuma musongwalume Amiwa kasa kyangye kufuma mulumu ne.

²⁸ Pano, Nkambo. . . . kabiji ne musachila Anweba pa bibye bintu byonse. Pano kyafikila kimye kyami kya kwamba pa Kyambo Kyenu. Tupai atweba Kyambo Kyenu, Nkambo. “Kyambo Kyenu bo Bukine.” Mpeshai myeo yetu ne kwitupa alwa—alwa lusa lo tubena kukeba, amba twilufumye ku Milaye yakwa Lesa bufuku buno, mu Kyambo, pakuuba mba mwitulame mulungu yense uno; kiswishai. Mpeshai kafunga wetu, awe mweo wabukilobo, bakazhi banji, baana banji, badikoni, ne matulasiti, kabiji ne muntu yense utwela ne kulupuka mukino

kishimikwa; kiswishai, Taata. Mu Jizhina ja Yesu Kilishitu twaipuzha ao mapesho. Amena.

²⁹ Pano, Nasaka kutanga kufuma pantu pabiji pa byanembwa bya Nkambo. Nasaka kutanga patanshi kufuma mu Buuku wa Masalamo, Salamo wabu 86. Kabiji pano Nasaka kutanga kufuma mu Mateyo Wazhila, kyapitala kyabu 16, 1 kufika pa 3. Kabiji Mbena kusaka kutanga kibese kya yuwe Salamo, kechi yensetu ne poso kufika ne pa veeleshi wabu 11, akyo kyapitaila pakachi ka afu wakyo.

³⁰ Kabiji Nakeba kubiji kikyeye, inge Nakonsha kwikitela mba mutwe, kasa Kyangye kusapwilapo ne: *Kimye Kya Kukwatakana Ne Kiyukilo*. “Kiyukilo kya kimye Kyakukwatakana,” akyo kibena kumwanyiika nobe kintu kyazhobakana. *Kukwatakana* (Mwamona?) *Kimye*, kimye kyakukwatakana, abyo byo kiji pakino kimye. Kabiji *Kiyukilo* kya kyokya kimye kya kukwatakana.

³¹ Mu—mu Salamo, mulombelo wakwa Davida, Salamo wabu 86.

Mubandamike kutwi kwenu, ANWEBA YEHOBA, ne kungitaba: mambo Amiwa ne muyanji kabiji ne wakajilwa.

Lamai mweo wami; mambo Amiwa ne wazhila: Anweba Lesa wami, pulushai kalume wenu waketekela mwi anweba.

Ngubilaiko lusa, Anweba Yehoba: mambo ko kwi anweba Amiwa ko ngita pajuba pajuba.

Sangajikai mweo wikalume wenu: mambo ko kwi anweba, Anweba Yehoba, ko Nasutwila mweo wami.

Mambo anweba, Yehoba, mwi wawama, kabiji mwiningezhezha jimo kulekela mambo; kabiji mwi wa lusa lwavujisha ku bonse bemwita.

Tai kutwi, ANWEBA YEHOBA, ku milombelo yami; . . . umvwai ku jiwi ja misashijilo yami.

Mu juba ja kumanama kwami Nkemwita: mambo anweba mu kangasuka.

Oo, bushe akyo kechi kyawama nenyi? “Anweba mukangasuka.”

Mu balesa kechi mujipo nangwa umo waesakana nenu ne, Anweba Yehoba; nangwa mingilo yaesakana na yenu ne.

Mikoka yonse yo mwalengele ikeya na kwimupopwela, Anweba Yehoba; kabiji bakejitumbijika jizhina jenu.

Mambo anweba mwi mukatampe, ne kuba muba byakukumya: anweba mwi Lesa bunke bwenu.

Telekai pano:

Mfunjishai jishinda jenu, ANWEBA YEHOBA; Ne—Ne amiwa nkendanga mu bukine bwenu: nungakanyai muweo wami ngakamwe jizhina jenu. (Kukwatakana! Mwamona?)...nungakanyai muweo wami ngakamwe jizhina jenu.

³² Amiwa mbena kwamba pano pa kukwatakana ne kimye kiyukilo. Pano, mu kyapitala kyabu 16 Mateyo Wazhila:

Kabiji kwaishile Bafaliseo ne Basaduseya, . . . na kumweseka aye, na kumulomba mba etumweshe kiyukilo kya kufuma mwiulu.

Kabiji Ne aye wibakumbwile ne kwamba mba, Kana ke mabaanga, anweba mba, Ke. . . Keshu bukakya bulongo: mambo jiulu jachila.

Ne lukeelo amba, Leelo kuji mvula. . . kechi bwakya bulongo leelo ne: mambo jiulu jachila ne kufinda. Anweba ba kafutufutu, anweba mwayuka kutolela maana ku jiulu; bino kechi mwakonsha kuyuka biyukilo bya ino myaka ne?

Aye Nkambo abikepo mapesho a lusa Lwanji pa kutanga kwa kikyeye Kyambo.

³³ Pano, tubena kwamba pa kukwe kukwatakana, kimye kyakukwatakana; kiyukilo kya kimye kya kukwatakana. Monai, Yesu wajinga papo, pa kutanga kwa Kinembelo kyapelako, Aye walengulwilenga basapwishi mambo akubula kuyuka kimye nangwa kiyukilo kya kimye. Bino, akye kimye kyonse kikala kintu kikatampe bingi ku bantu, monai, pakuuba mba bayuke kiyukilo kya kimye kyo mubena kwikalamo; mambo Lesa wikinemba kyaikalatu patoka kyakuuba mba kafwako muntu nangwa umo wakonsha kwi kinyema ne.

³⁴ Bino, mwailatu bumuntu, Amiwa mbena kubwela kunyuma ne kutolapo kufuma ku bamwingilo, bakwabo bakalume bakwa Nkambo mu kimye kya mu Baibolo (nobe kiyukilo kya kimye kya kwa Nowa, ne kiyukilo kya mukimye kya kwa Danyela ne—ne bikwabotu, biyukilo byapusanapusana), bino Nakeba kukiluka byobyo bufuku bunu na—na mambo a kimye, pakuuba mba. . . Bino kikala jishinda ja kwa Lesa kimye kyonse, ja kupainamo ki—kiyukilo kya kimye kya bulesa, pakuuba mba muntu yense wakonsha kuyuka mba kimye ka—ka po kyaubiwe. Kabiji abo Bafaliseo bafwaijilwe kuyuka kimye kyabo. Bafwaijilwe kuyuka kimye byo kyajinga. Aye waambile pantu pakwabo mba, “Inge anweba mwayyuka Ami, anweba mfafwaijilwe kuyuka juba Njama.” Mwamona? Ke—ke kiji, ke—ke kintu kikatampe bingi amba twikyumvwisha. Mwamona, “Kwakubula kumvwisha!”

³⁵ Akyo ikyo kyo batazhangako bangauzhi kimye kyonse pa kikyeye, abo baambile mba, “Kabiji aye wayukile, kupichila mu

bimwesho bifuma kwi Nkambo. Kabiji Kyambo kya Nkambo kyaishile ku ba—bangauzhi bakala.” Mwamona, abo bajinga nabuyuke kupichila mu Kyambo kya Nkambo, monka mu bangauzhi. Kabiji nanchi, bangauzhi bapainenga kiyukilo. Nobe, muntu umo walajile ku lubaji lumo pa kimye kyabaya, kabiji wabwela waalukila ku lubaji lukwabo. Muntu umo wavujile bya kumvwala byanji. Kabiji oo, kwajinga bintu byavula byo baubilenga pa kumweshwa kiyukilo kya kimye kyabo. Kabiji pano twayuka mba Lesa walengele meulu ne ntanda, kabiji—kabiji nanchi wamwesheshe mingilo Yanji amba Aye ukamweshwa kimye Kyanji mu kiyukilo, awa Lesa umo uji na bumi leelo. Nanchi twafwainwa kwikala, kintu kimo. . .Byo tubena kumona akya—akya kimye kyo tubena kwikalamo, kujipo kintu kimo akyo muntu umo kyo abula kutako muchima, pantu pamo. Mwamona? Mambo Lesa kechi wakonsha kuleka bibye bintu kumweka kwakubula kwitupa kiyukilo kya lumbuluka ne, amba kwepi, mba—mba twakonsha kuyuka.

³⁶ Pano kino kyo kintu leelo, kyakuuba mba basapwishi, kechi twikitanga bulongo ne. Byonka byo kyajinga pa kyokya kimye, kechi balangulukile amba kimye kyafikijile. Abo—abo balangulukile mba bajinga bingi na mutende pa kyokya kimye, kabiji nanchi abo kechi bapembejilenga Mesiya ne. Kabiji Yesu waamba mba Kwiya Kwanji ku kekala “nobe ngivi bufuku,” mu kimye—mu kimye bantu po bakabula kuketekela Kwiya Kwanji. Pakuuba kwajinga babisungu bamo baile na kumusambakana Aye, afu yabo, bajinga na manyi mu malampi abo kabiji benengezhe; abo bapembejilenga kyokya kiyukilo. Kabiji ibo bo Mbena kwambapo bufuku buno, monai, kuboba babena kupembelela kiyukilo pakino kimye, kiyukilo kya Kwiya Kwanji.

³⁷ Abye biyukilo byapanwa, ne Nkambo, byapewatu ku baitabila bonka. Babula kwitabila kechi bebimona ne. Abo bapitapotu peulu yabo, kabiji kechi be kimona ne. Kabiji pano, byonka byo kiji kyakine amba Malaika wakwa Lesa wakonsha kwimana payuwe pulatifomu bufuku buno, kijitu pamo nobe—nobe Mbena kutala pe obewa, kabiji kasa Mbena kutala pe aye; nangwa obewa wakonsha kutala pe aye kabiji Amiwa kechi nakonsha kwi kimona ne, nangwa Nakonsha kutala pe akyo bino obewa kechi wakonsha kwi kimona ne. Bino, mwayuka mba akyo Kyanembwa; akyo byo kiji kya Bukine. Abo bamwene. . .Anweba mwayuka mba Paulo waponene panshi, pakuuba abo. . .kafwako umo mwi abo wamwene Kyeya ne.

³⁸ Akya Kyeya kyajinga ponka kimye Yoano kyo aimene ku meso ajibumba, kabiji masauzande kasa baji kukitulu kokwa, a basapwishi ne—ne bamaana, bantu bamunema. Kabiji Yoano waambile mba, ayemwine, wapaine lushimuno lwa kumona Mupashi wa Lesa kasa ekila nobe kunda kwiya pe Aye, ne

Jiwi jaambile mba, “Awe ye Mwaana Wami Amo mo Namwena lusekelo kwikalamo.” Kabiji kafwako mukwabo Wamumwene ne kanatu Yoano. Mwamona? Kyajigatu kyanji.

³⁹ Bushe mwamona byo kyajinga tulatula, kiyukilo kya bamaana? Batajilepo, kyajinga ponka... Bajinga ba Hebelu. Abo kechi bajinga kine bapalanguzha byamulwelele bena India ne, bajinga Bahebelu; mambo bajinga mu kyokya kyaalo na kufunda byamulwelele, pakuuba mba bapwishe lufunjisho lwabo. Kabiji byo bajinga... batajile jakuya ku Yelusalema, kabiji byo bayukile mba bamwene totwa tubangabanga tusatu kufunda ku umo wa—wa ndonda ya kusema-kwabo, ya Hama, Shema, ne Yafeti, mwaila mitundu yo bafumineko, umo umo, kabiji bamwene totwa tubangabanga mu ndonda ya kusemwa-kwabo. Akya kyajinga kiyukilo kwi abo, amba atwa tubangabanga inge twaikala mu mulaini, nishi Mesiyasa uji panopantanda.

⁴⁰ Oo, ami! Kechi kyajinga kyakukumya ne kyokyo baishijile, “Uji kwepi Aye? Uji kwepi Aye wasemwa Mfumu wa ba Yudeya? Twamona Kabangabanga Kanji ku Musela, kabiji twaiya na kumupopwela Aye. Uji kwepi Aye?” Abo bayukile mba awa muheche Mesiyasa wajingapo kuntu kumo, mambo Lesa wibapele kiyukilo kya kimye, amba Lesa ne muntu babena kukwatakana pamo. Kukwatakana kwa musango ka, kimye Lesa kyo akwatakene Ayemwine mu mubiji wa muntu! Kine kishinakata, kwakila kubaya pa kukwatakana konse kwaubiwapo kala, kyajinga kimye Lesa po a kwatakene na muntu; kabiji walekele Kwanji—Kwanji kukatampe kwa musango wabu Lesa ne kutanyika tente Wanji kabiji wabikamo ne bumuntu, kabiji waikale ke umo wa mwiabo, pakuuba mba ebakule. Kukwatakana. Kyo kika? Akya kyaletete mutende pakachi ka Lesa ne muntu myaka ne myaka. Twakila bingi mukusata.

⁴¹ Kabiji biyukilo kechi byatuminwe... Pano ngiilangulukatu, muntu yense, kabiji ne bonse bapalanguzha mulwelele; bantu, mu oa moba, makoloko abo ajinga tubangabanga. Kwajinga malonda waile peulu ya—ya kyamba, kabiji wakajilanga popa na kumona. Kabiji wamwene tubangabanga tumo twajinga mu milaini, byo twapichilenga, aye wayukile mba akya kyajinga kimye ka. Anweba mwavuluka mu Binembelo, “Kimye kiji ka, malonda?” Kabiji malonda wabwelele na ku mubuula kimye byo kyajinga. Monai, balaminenga kimye na tubangabanga.

⁴² Pano, kechi kyajinga kyenye amba atwe tubangabanga twajingatu monka mu mulaini wa boba bamaana basatu kabiji kafwako mukwabo wikimwene ne? Mwamona? Byajingatu monka mu mulaini. Bino, wakonsha kwikala monka mu mulaini na Kinembelo. Mwamona? Atwa tubangabanga byo twakwatakene pamo, kukwatakana pamo mu yuwe mulaini, bantu basatu nabo bakwatakene pa kimye kimotu. Kabiji

wakonsha kwikala kasa mwakwatakana ne Lesa, mu Kyambo Kyanji, poso abye bintu byaaluka ke bituntulu, kabiji wakonsha kwi bimona ne kuyuka mba byakine. Mwamona? Kiyukilo kya kimye! Obewa waakonsha kwi kimwenetu peulu yakyo, ne kwamba mba, “Aa, kafwamo maana ne!”

⁴³ Pakuuba kwi *obewa* kechi mwabula maana ne. Kwi obewa, wakwatakana na Kyambo, kabiji abye byo Kiji. Nanchi kya—kya kine Kyeya, Mulongo Pat, inge—inge—inge—inge wamona kikye kiyukilo kyakwatakana na waitabila. Kabiji ibo bo Mbena kwambila bibye, ke waitabila, mambo wabula kwitabila kechi wikimona ne. Kabiji kyakonsha kwikala kulengululwa kwabaya bingi umvwe Aye wajinga panopantanda leelo, ku bavula basapwishi betu leelo, abo bakonsha kukakalwa kutanga kikye kiyukilo; biyukilo byo tubena kutanga pajubapajuba pano pa tabbanako, kasa tumona bibye bintu. Kabiji bakwabo babena kwikitanga ne kumona kuboko kwanemba pa lubumbulu, bino bavula be kilengululatu, kabiji kechi bekimona nangwa pachechetu ne. Kafwako byokiji kwi abo nangwa pachechetu ne; abo kechi bekimona ne.

⁴⁴ Pano monai, akyo kyo kikye, amba Aye—Aye watongwele biyukilo bya kyaalo. Bino, byo bamwipwizhe Aye pa kikye, bakebelenga biyukilo; kabiji Aye wibapele biyukilo bya mwekele. Kabiji bakebelenga kuyuka mpelo ya ntanda kana ikekalako kimye ka, kika kikekala kiyukilo ku mpelo. Kabiji Aye wibamwesheshe bintu byavula kupichila mu Binembelo bya pa biyukilo bya kyaalo, ne pa kiyukilo kya mwiulu monka mu meulu, kabiji ne biyukilo bya pano panshi; Aye wibapele biyukilo, kiyukilo, biyukilo, na kutwajijilatula na kiyukilo. Kabiji inge... Aye wibambijile kokwa mu kifulo kimo pa kiyukilo kya kyaalo. Waambile mba, “Inge mwamona byaalo,” monai, “byatatula kubungakana monka mu Yelusalema,” monai, nanchi twayuka mba kimye kya makatazho abo kyafwenya kufwenya, “inge mwamona Yelusalema wazhokolokwa na mazhita.”

⁴⁵ Bino, kasa bakyangye kuba kikye ne, Lesa...ntanda yakwatakene pamo. Titusa, awe jenulo mukatampe mwina Loma, wakwatakenye kwiya pamo kwa mazhitane kwiya pamo, panyuma babo Bayudeya ya kukana kiyukilo kyapaine-Lesa kya kimye kyaabo. Akyo kyo kimye Titusa kyo akwatakenye mazhita anji pamo, kabiji ne kwiya na kushinda muzhi. Patanshi kwajinga kukwatakana kwa bantu bakwa Lesa (kyatelwamba) kwimena Kyambo kya Lesa, kyaalo kasa kikyangye kukwatakana akyokine mukwimena bantu ba Lesa. Monai, akwa—akwa—akwa kukwatakana; kukwatakana pamo.

⁴⁶ Naketekela mba tubena kwikala mu kimye kikatampe kya kukwatakana. Amiwa mbena kufumyapo ao malaiti achila, kabiji ne kumweshia biyukilo ne bintu byonse (bya banabakazhi, byo booba; kabiji ne banabalume, byo booba; kabiji ne bipwilo, byo booba), na kumweshia kujije jibumba jicheche, na muchima

wami yense, Naketekela mba tubena kwenda mu ndonda ya Kyambo kya Lesa mu uno awala wabu ngauzhi mukatampe, Kwiya kwa Nkambo Yesu kasa kukyanye kufika; kukwatakana pamo kabiji ne kwikala benengezha.

⁴⁷ Pano, mwamona, Titusa kasa akyanye kukwatakanya byaalo na mambo. . . mazhita anji pamo, Isalela wakwatakene pamo abo bene kabiji ne kwibungizha pamo abo bene, amba abo kechi bakamuketekela Yesu amba iye Mesiyasa ne. Abo bamukaine Aye, kabiji Aye bamufumishe mukachi kabo, ne kumupopa Aye. Kabiji pano, byo bakaine lupulukilo lwatuminwe kwi abo, bakwatakene pamo abo bene pamo pakuuba mba bekyube. Bino, lamai kyokyo mu milanguluko yenu: kukwatakana abo bene pamo, mukuuba mba bakane Mbila ya kimye! Abo baubile kyokyo. Kabiji byo baubile kyokyo, nanchi kiyukilo kya kyaalo kifikizhiwe.

⁴⁸ Byaalo byatapa kukwatakana pamo abo bene, kabiji Titusa waletele iye zhita ikatampe ya bena Loma ne Bangiliki kabiji ne kuzhokoloka masakwa a Yelusalema, ne kushikila bantu mukachi, kabiji bafwile kuzala. Abo bajilenga byula kufuma ku binchi. Yosefasi, mukatampe wanemba jishimikila, witubula. Kabiji bajile nsono kufuma pa mushiji. Nanchi batekele ne baana babakwabo ne kwi baja; monai, nobe bantu bakonya. Kabiji pano kimye, byo kyafikijile, Titusa, abo baikela pa tutumbatumba, twazhokoloka Yelusalema kokwa, kabiji—kabiji aba bantu momwa balangulukile mba babena kuuba kyaswa muchima wakwa Lesa, byo bamwene aa mazhita kasa abena kwiya na kufoola. Abo bakaine kumvwa awa Nkambo Mukatampe, Nkambo Yesu, babulai kyokyo.

⁴⁹ Kechi kwajingapo nangwa umo wa Benakilishitu wakwachilwe momwa ne, mambo abo bamwene kiyukilo kabiji bafuminemo. Mwamona? Baambile mba, “Balekai baji peulu ya mutenge kechi bekile panshi ne, nangwa aye uji mubujimi abwele, amba akasende kochi wanji ne; mukanyemene mu Yudeya, kabiji lombai mba kunyema kwenu kechi kukekale mu kimye kya mashika ne nangwa pa juba ja Sabando ne.” Mambo, mu kimye kya mashika, mu—mu tutumbatumba muyula mabeebe; kabiji pa juba ja Sabando, bizhilo—bizhilo byashikilwe, kibelo kyasakwa, kabiji bakonsha kukwatwa mu yewa musango. Mwamona? Twakeba kufika pa kyokyo bukiji bukiji pa. . . Lesa byo oba byobyobintu, inge Nkambo waswa.

⁵⁰ Monai pano, Aye. . . Abo balombejile mba kikekala kuuba mba. . . kechi kwikala mujoja jishinda ne, Yesu wibabujile mba lombelelai pa kyokyo, kabiji kechi bakwachilemo nangwa umo momwa ne. Bonse banyemene mambo bamwene kiyukilo, kabiji banyemene; byo byo kyajinga.

⁵¹ Oo, bipwilo leelo byo byafwainwa kumona kiyukilo kya kimye kyo tubena kwikalamo! Nyema lubilo kuya ku Kalvali

byo wafwainwa kuuba, mambo a Bumi; kechi kuya ku kipwilo kimo ne, kana kwi Yesu Kilishitu. Kwatakana obewa mwine ne Aye, kabiji kechi na kabungwe kamo nangwa na lufunjisho lwa kipwilo kimo ne. Kwatakana ne Kilishitu, kabiji wikale washininwa mba ye Iye. Obewa kechi wakonsha kutolatu kintu kiji kyonse ne, wafwainwa kushininwa mba ye Iye. Ke kimye kyakukwatakana kyawama!

⁵² Pano, twamona mba bakaine Mesiyasa ne kukwatakana bene na bene pamo kabiji ne kulenga abo bene mabumba, kabiji balengele ki—ka...mulanguluko mukachi kabo amba inge muntu umo wamutambula Yesu nobe Ngauzhi, amba bakapangiwa kufuma mu kipwilo. Anweba mwavuluka yewa songwalume mpofu wasemekelwe na meso abumpofu? Kabiji banababwanga baambile mba, “Ing’anyi walengele mambo? Aye, nangwa bashanji, bainanji?”

⁵³ Kabiji Yesu wambile mba, “Mu ao mambo, nangwa umo ne; kana mba mingilo yakwa Lesa yubiwe, iyukanyikwe.”

⁵⁴ Kabiji anweba vulukai, baambile mba bashanji ne bainanji kechi baambile ne. Baambile mba, “Bayuka mba awe ke mwaana wetu, bino kechi twayuka byo a bukilwe ne.” Mambo ba Yudeya baambile mba muntu yense wakonsha kushimuna mba Aye ye Ngauzhi, amba bakonsha kumupanga pakachi kabo.

⁵⁵ Bino, mwamona, mingilo yakwa Lesa yajinga ya kuuba mba awe songwalume kechi wajinga wa kulubaji lwa joja jibumba ne. Kabiji aye waambile mba, “Bino, ke kintu kyenye kwi amiwa kyakuuba mba kechi mwayuka kwafuma yuwe Muntu ne, kabiji nangwa byonkabyo Aye wapele kumona meso.” Mwamona? Bino, aye wakonsheshe kwikyamba. Monai, aya yajinga mingilo yakwa Lesa. Aye wa mulengele kwikala wa bukwa, kabiji wabututulu, kabiji aye wakonsheshe—aye wakonsheshe kubulang’ana mambo kechi wajinga wakaswa ku kintu nangwa kimo kyafuma kuntu kumo ne. Aye wajinga yewa mingilo po yaingijiwa, kabiji kine aye wamwene wanji...pa kimye kyanji kitanshi mu bumi bwanji.

⁵⁶ Bino, ba Yudeya bakwatakene abo bene pamo kukana Yesu kabiji—kabiji ne kukana bu Mesiyasa Bwanji, kabiji ne Mbila Yanji ya Bumesiyasa. Tubena kumona kintutu kimo ne kino kimye kasa bibena kubiwa, bintutu bimo. Komyunizimu ubena kukwatakana mu konauna kipwilo, kabiji jishindatu jimo ja kuba mba...ko kuuba mba panyuma kipwilo ne akyo kyakwatakana akyo kine, mu Kije kya Bipwilo, Kije kya Bipwilo kya Ntanda yonse, mu kukanya ne konauna Mbila, Kyambo! Abo bakana Kyambo, bipwilo byo byauba! Abo kechi bakonsha Kwikiswa ne mambo Kyapusana na mafunjisho a dinominesheni yabo; kechi mambo ne nangwa kwikale Mimbungwa Yamujilo yavula ikobame mwetu—mukachi ka bantu, nangwa bantu baanga bekale...bintu binga byakonsha kwambilwa jimo ne

kumweka byamweka, kabiji ne biyukilo byonse bikatampe Aye byo alaile bya mu moba a kupelo; kechi bakonsha kwikyuba ne.

⁵⁷ Onkao mambo, babena kukwatakana abobene kino kimye, kabiji ne kafunga wenu kuno ne bavula bakonsha kwi mubuula, ako ke kutanga, amba baji. . . baji na mutanchi wa ekyumeniko wa—wa—wantanda. Kabiji ba. . . kuji wamwingilo wabena Luther utalapo pakikye. Kuuba mba, inge kwaiya lukatazho, lwamweka mu kikalakulo kuno; inge kechi twakwatakana na yoya ndonda ya ekyumeniko ne, nishi kipwilo kyetu kechi kyakonsha kwikala kipwilo ne, kabiji bakonsha kwi kingijisha ke mushitolo mwakusungila bipe. Nangwa inge umo wa mwi atweba balongo wamona muntu umo ubena kufwa nangwa wakozhiwa, ne kweseka ku mukwasha mapesho abu Mupashi, twafwainwa kulozewa pakikye; kyakine ibyo. Twakonsha kukaswa myaka jikumi mukaleya na mambo akwingila kiji kyonse, mambo kechi twi bamembala bakako kabungwe ka ekyumeniko ne. Kechi mubena kumona kiyukilo kya lukinyama nenyi? Mwamona? Mwamona?

⁵⁸ Bino, twamona kikye kimye kya kukwatakana kasa kibena kwiya. Mwamona? Bino, tajishaitu! Kabiji nanchi kipwilo kya kwatakana akyo kine kwimena Mbila; kabiji pano umvwe kyaubiwa byobyoy, byaalo bibena kukwatakana abyo bine mu Komunizimu mu kuuba mba bonaune kipwilo jibiji; byonka byo kyaubiwe mu kimye kitanshi. Mwamona? Kibwezhapo jibiji akyo kine.

⁵⁹ Isalela wakaine Mbila patanshi. Kabiji byo bakaine Mbila, pano ke mazhita, ne bumi bwa byaalo bwakwatakene abo bwine pamo (na byaalo bikwabo), kabiji baishile ne konauna kipwilo. Kabiji leelo, bakana Mbila ya kwa Nkambo Yesu, kabiji abo Beikana. Kabiji pano, kimye kyafika kyakuuba mba Komyunizimu ubena kukwatakanya ntanda pamo kwimena kipwilo. Monai, kyafwainwa kwikala byobyoy. Bino, kyaikala kyakosa kwamba kyokyo.

⁶⁰ Kyajinga kyakosa kwi abo ba Yudeya pakuuba mba baketekele. Baambile mba, “Pano iyai, balongo, twamona kyokyo—kyokyo amba—amba Lesa wetu uji ne atweba, kabiji nanchi atweba—atweba tusakuya mu tepo. Kabiji pano tusa kulomba, ne kuleka taata wazhila *Kananga-ne-kananga* kabiji ne taata wazhila *Kananga-ne-kananga* atangijile mu milombelo. Shikai kibelo!” Kabiji Titusa waimene pa mulanguluko wanji, kabiji waimene ponkapa pepi nobe mwaka umo nangwa yavula. Monai, kasa babena kulonda, ne kwibatana kajo konse. Kechi kwajingapo nangwa umo wa mwiabo walupukilemo mu muzhi; kabiji bafwile, kwakubula kajo. Kabiji byo atwelele mukachi momwa ne kupumuna bibumba, kabiji mashi alupukile ne kupita nobe mikola kufuma konka kobatapijile bintu byonse byajinga momwa.

⁶¹ Bino, Malaika wa Nkambo waawile kyokyo, kunyuma kokwa mu Lulayang'ano Lwakala, kabiji wabulang'ene mba akya kikobiwa. Kabiji abo bamwingilo, bajinga basapwishi, bafwainwa kutwala kyokya ne kubuula bantu kikye, mukifulo ya kyokyo, Yesu byo aimene mukachi kabo, abo kechi bamuyukile Aye ne; kabiji ne kweseka kulenga na—na. . . musango umo wa—wa kulu-kwa kalulu, “Tubai kintu kyafyamika, lekai tumone byo—byo kyubiwa! Tumweshai kiyukilo.” Mwamona?

Kabiji Aye waambile mba, “Amiwa. . .” Kika, Aye wauba bintu byavula bingi, nangwa byonkabyo kechi bakonsha kwikimona ne. Mwamona? Kabiji nanchi Aye byo bamukaine kwikala. . . Mbila ya joja juba, abo bakaine Mbila ya joja juba.

⁶² Abo bakakelwe kumona kiyukilo kya mujoja juba. Kabiji ne kiyukilo kya—kya bungauzhi bwa mu Baibolo bwa ambiwe abo kasa bakyangye kwikalako, kabiji baambile mba, “Twayai tutwelemono pano!” Abo bajinga bantu bazhila. Bajinga bantu bakuuba mba kechi wakonsha kutongola munwe pa bumi bwabo ne. Abo kechi bakonsha kwikala *kyokya ne*, kabiji nanchi—kabiji nanchi ne kwikala ba—ba—ba pulisiti. Ng'anga wafwainwa kwipaiwa, aye bafwainwa ku mwipaya na mabwe pa ka kintutu kacheche. Nanchi wafwajilwe kwikala bwikalo bwatoka, bumi bwazhila. Aye kechi wakonsha kwikyuba ne, mambo bakonsha kumwasa mabwe pa kintu kiji kyonse. Kabiji bajinga bantu bakatampe, kabiji bantu bazhila ku meso a bantu, nangwa byonkabyo baile na kwamba, “Pano, tukoba. . . Tuji na Lesa, aye Lesa Waikala ne atweba kupita mu mankulo onse. Atweba tukaya mu tepo Wanji wazhila.” Awa wajinga tepo wazhila wakwa Lesa! Bino, mwamona, Aye bamukaine monka mu tepo Wanji wazhila. Mwamona? “Tukaya mu zubo ya Nkambo. Bino anweba bonse Bahebelu mwayuka mba atweba twi mukoka wasalululwa, byo tuji, kuno. Kabiji Lesa ye Lesa wetu; Lesa wa Abulahama, Izaka, ne Yakoba. Uji ne atweba. Aye uketupokolola kufuma kwi abo bena Filisitiya bambulwa mukanda baji kokwa (byonka byo kyajinga), abo bena Loma ne ma Ngiliki. Aye uketupokolola kufuma ku kyokya. Twayai tuye ku zubo yakwa Nkambo!”

⁶³ Akyo kyaumvwanika bulongo; pano kika kyo baubile? Aye Mushimikishi wa zubo wajinga monka, mu musango wa kaapeta mwina Galileya, kabiji Aye bamukaine; ao Lesa Ye ashinikishe kwikala Muluwe Wanji wa kimye, kabiji ye Musapi. Kabiji abo Bamukaine. Nanchi kwaula konse, bukishika bonse, bitapisho byabo byonse kechi byajingapo na kilumbululo ne kwi Lesa ne. Abo be kyuba! Kabiji Lesa lekai iye zhita ikatampe yikyonaune.

⁶⁴ Kabiji twamona ja buleelo, nobe bipwilo kupichila mu madinominesheni kabiji ne bikwabotu, na kukana Kyambo kya Lesa. Abo kechi bakeba obewa kwi babuula pa bibye bintu ne, kabiji sayaasi wakonsha kwimushinina kupichila mu bipikichala ne bintu byonse, kabiji kafwako kintu nangwa kimo

kya kwingila Nakyo ne. Nanchi komyunizimu ubena kwilenga mu kuuba mba ekipaye, kijitu pamo nobe kyaubile Titusa, kabiji Baibolo waamba mba bakekyuba. Kya kine!

⁶⁵ Bino, anweba mwamona ko tubena kwikala? Kimye kya kukwatakana, umvwe twamona bibye bintu kasa bibena kukwatakana. Oo, kika kyo twakakelwa kumona bibye bintu? Anweba mwakonsha—anweba mwakoba kutala mumwe mu Binembelo kabiji ne kumona popa Aye po alaile kyokyo, ne Aye byo akooba. Bino, tubena kwikimona kasa kifikizhiwa. Twamona mu kipwilo bintu Aye byoalaile kuuba; twi kimona kasa kibena fufikizhiwa. Twamona byaalo kasa bibena kukwatakana pamo. Tubena kwamona tubungwe kasa tubena kukwatakana pamo. Twamona bipwilo kukwatakana pamo. Ke kimye kya kukwatakana. Ke kimye kya kukwatakana. Ao ye mupashi wa nkulo, “Twafwainwa kukwatakana.” Kintu kyonse kyo mwakonsha kwambapo kyaikala kibika mu kabungwe; ne kafulumende kechi wakonsha kwikitambula ne.

⁶⁶ Mwayukatu, nobe bena kyaalo... Amiwa nobe ngikazhi kechi nakonsha ne, nobe ngikazhi wa mu United States, nangwa byokabyo Ami—Ami...mwakonsha nkupa cheki wa faivi dolla kabiji Nakonsha kutemwa kunembako jizhina jami. Hmm. Monai, Amiwa kechi nakonsha kwi kyuba ne. Monai, ke kimye kya kukwatakana. Byonse byafwainwa kupita mu kabungwe ka musango umo, kabiji aka kabungwe kyo kintu kimo kileta kiyukilo kya lukinyama. Mwamona? Ke kimye kya kukwatakana, kabiji kibena kwingila kuya ku kyonkakya. Mwakonsha kwikimonatu na meso enu, inge mwakonsha kutalapo. Ke kimye kya kukwatakana, ako bintu byonse bibena kukwatakana pamo.

⁶⁷ Mu Yuda—Bayudeya ba kwatakene abo bene kumukana Yesu, kwikala—kwikala Mesiyasa wabo. Onkao mambo, twamona kyamwekele. Tubena kintutu kimo ne pakino kimye, komyunizimu kasa ibena kukwatakana mu kukeba konauna kipwilo, panyuma ya kukwatakana kwa kipwilo mu Kije kya Bipwilo kya Ntanda na kweseka konauna Mbila, Kyambo kya Lesa. Beseka kwi Kifumyapo. Kintutu kyo bakonsha kuuba ke kwilengela abo bene kije, mambo akuuba mba baabenamo; jibumba jicheche papo, ba Methodist, ne ba Baptist, ne ba Lutheran, ne ba Presbyterian, Church of Christ, ne bikwabotu bya musango yeo. Kechi bakonsha kuubapo kintu kimo ne, mambo *awe* umo ukekala waimena *yuwe* umo, *awe* umo ukekala waimena *awa* mukwabo, lufunjisho lwabo lwapushetu byonka biji musela kufuma ku muzhika. Monai, kechi bakonsha kwikyuba ne. Pakuuba bonse pamo, kasa batangijilwa na mutwe umo mukatampe, baji nakyu. Abo nanchi baji nakyu.

⁶⁸ Ao ye musango ba Katolika ye bakwatakenamo, ba Katolika waku Loma, mambo akuuba mba bakwatakana, baji... bavula ke ba Katolika waku Loma; ba Ngiliki ne ba Katolika bakwabo

kechi—kechi baji pamo nobe ba Katolika baku Loma ne. Pano bakwatakana pamo, kabiji ao oene mambo obaji na lumvwang’ano pamo. Nangwatu kyubiwe byepi, awa popu ye mutwe wa bintu byonse. Mwamona? Kabiji nangwa muntu mukwabo ambe ka, “Aye ye wapelako; ye—ye—ye uji mukifulo kya kwa Lesa, kyo kyonka; yewa londela Lesa; aye ujipo na luusa pa kalunga ka bafu, Mwiulu, ne kifulo kyalumanamo.” Mwamona? Nanchi kechi kujipo kintu kyakonsha kubiwa *myewa* musango ne; kyonse kyo aamba, kyo kyafwainwa kubiwa.

⁶⁹ Bino, ba Polotesitati babena kwibika abo bene kwikala ba mutwe byonkabya, pamotu. Kabiji Baibolo kechi waamba mba kwajinga kipashang’ano kyalengelwe kya lukinyama? Kipashang’ano kyo kika? Ke kintu kikipasha, kyalengwa nobe akyo. Byobyu kiji, kintutu kimo. Kyo kika? Kupichila mu kukwatakana bene pamo, kabiji awe ye mupashi wa nkulo, ke *kukwatakana*.

⁷⁰ Kukwatakana pamo, ne kweseka konauna Mbila. Abo be Yonauna byepi? Bakonsha konauna byepi Kyambo kya Lesa? Bekilengela Kyaikala kyabula bulume, kyabula bulume, pa kufujisha mafunjisho a bantu byonka byo baubile kunyuma kuntendekelo, kabiji balengela Kyambo kya Lesa kyaikala kyabula bulume. Monai, baamba mba, “Oo, ko kuuba mba. . . Kinetu, pa byonse, . . .” Monai yuwe mwanamukazhi wabula kuyuka bupopweshi kasa eseka ku . . . aye . . . Nalubamo jizhina janji; inge Nakonsha kwijivuluka. Aye . . . Amiwa mbena kulanguluka pa bintu byavula.

⁷¹ Amiwa pa kulanguluka yuwe Mrs. Nation juba jikwabo; Naketekela inge twajinga na mukwabo wa musango yewa wakonsha kwikalako. Wajinga umo wayanga mu bishimikwa bya malwa kabiji ne kulalaula wisiki, kabiji ne kutaya biyukilo ne bintu byonse byayewa musango. Kika kyo kwabujila bamo banabakazhi ba yewa musango leelo, ne kuya momwa kabiji ne kutabaula bimo bye bipikichala bya mulekese bya banabakazhi ba muntundu wanji, ne bintu biji byobya? Amba, kechi bakiji nabyo ne.

⁷² Pano, bino awe mwanamukazhi, wabula kuyuka bupopweshi, waambile mba—mba “Baibolo kechi uji mwaila mizhilo ya ntanda ne, kyakuuba mba atangwenga mu masukuulu akafulumende,” ne bintu biji byobya.

⁷³ Pano ne abo, mwikimona jibiji, babena kweseka kwamba mba, bantu bafunda Binembelo, waambile mba “byavula bya bungauzhi bya awilwe mu Baibolo byailetu mungi, kabiji kechi byafikizhiwe ne.” Kabiji anweba mwikyumvwapo ne kwikitanga. Kabiji babena kweseka kwamba bintu biji byonse; mwamona, babena kweseka konauna bulume bwa Kyambo. Inge bakonsha konauna ne kupingishamo mwi Akyo lufunjisho lwa

kipwilo nangwa kintu kyauba bantu, akyo kimweka ku meso abo kwikala kintu kyawama kukila Kyambo, babwela be Kyonauna na—na mafunjisho a bisho. Kabiji abyo byo babena kweseka konauna Kyambo kya Lesa, ke kupichila mu mapolitikisi.

⁷⁴ Bino, kila kipwilo kiji na mapolitikisi akyo. Akyo Kipwilo kya Kilishitu kiji na akyo, kipwilo kya Bwinakilishitu kiji na akyo, kabiji ba Baptists, ne ba Methodist, ne Presbyterian; bonse banji na mapolitikisi apusanapusana. Bino, babena kufuma ku byobya mambo baikala baabenwamo. Monai, kechi kyafwaijilwe kubiwa kunyuma ne, bafwainwa kwikyuba ponkapano. Monai, akino ke kimye kukwatakana, kabiji pano babena kwikibika pamo ne kwi kibungizha kabiji ne kumona byo babena kulupukamo nabyo. Ami, kijitu pamo nobe kulenga shinkwa kufuma ku nyama, kabiji ne biswaswa kufuma mu kikopo, kabiji bintu bikwabo byo baji nabyo pamo; kabiji ne kwikimvwanga pamo, ne kutayapo tamba yabola ne bintu bikwabo pamo, kabiji wamona byo wakonsha kufumyamo. Amiwa kine kechi nkeba kiji kyonse kya byobya ne. Ine, mwane! Abyo byo babena kuba. Monai, babena kusenda bantu baketekela mba Yesu wajinga jashi jabubela, kipwilo kyaketekela mba Yesu wajinga jashi jabubela; kikwabo, bamo baketekela mba Aye wajinga ngauzhi.

⁷⁵ Umo waamba mba, “Moba abya kukumya apita.”

⁷⁶ Ne mukwabo waambile mba, “Kwakonsha kwikala kintu kya byobyo.”

⁷⁷ Kabiji byonse bye pamo; kabiji Baibolo waamba mba, “Babiji bakonsha kwendela pamo byepi kanatu baswang’ana?” Mwamona? Pano, ao ye musango wakukwatakana ko baji nako. Kabiji ne kwikala na umo taata wazhila mukatampe peulu yabo, kabiji ponkapo mwaikala na kipashang’ano kya lukinyama, byonkatu byaamba Baibolo. Pano baji na wamwingilo mwina Luther, ye mutwe wakyo. Kyawama, twamona mba ke kimye kya kukwatakana. Kintutu kimo, Komyunizimu ne byonse kukwatakana pamo; mu ntanda, kabiji ne mu kipwilo ne bikwabotu, kasa bibena kukwatakana pamo.

⁷⁸ Talai ku bilengwa na lesa. Oo, ami! Bilengwa na lesa, inge mwakonsha kumona bilengwa na lesa, kyubatu bintu bimo. Bilengwa na lesa ke kalenda wakwa Lesa wa biyukilo. Bushe mwayuka kyokyo nyi? Yesu wibambijile mba bamone ku bilengwa na lesa. Kalunga ka meema kakobaanga kyongo, mwamona, kabiji ku kekala bintu byapusanapusana, kabiji ne bitetashi mu mampuzha apusanapusana, makondo abyaalo, biyukilo mwiulu, biyukilo pantanda, konse konse kukekala biyukilo bya kimye kya kwiya.

⁷⁹ Talai makumbi. Makumbi kasa akyangye kuleta mvula wakikwila, mwayuka byo kyubiwa nyi? Makumbi acheche avula eya pamo, ne kulenga jikumbi jimo. Kyawama, aje jiji na mwela ubena kwijipupa, aje jikwabo jiji na mwela mucheche ubena

kwijipupila, kabiji onse apupila pamo, ne kwikala na kikukwila. Mwamona? Akwatakana pamo kasa kukyanyge kwikala kipupu; bafwainwa kuuba.

⁸⁰ Monai bibata ne mashipi byo a kwatakana ao ene pamo kasa bakyangye kufuma mu kyaalo kyabo ne. Mwamona? Bakwatakana pamo. Mwakonsha kwibamona kutumbuka kufuma pa kiky kizhiba, kufuma papo ne kuya kokwa, bonse kasa babena kwiya pamo. Abo babena kukwatakana, kwinegezha kuuba mba bakonsha kutumbuka. Monai, kijitu . . . abya ke bilengwa na lesa, kabiji Lesa ye wibilengele, kabiji bilengwa na lesa bingila na ndonda ya lunengezho lwa Lesa. Ke muzhilo, ke muzhilo wa Lesa wabulwa kunembwa, amba bilengwa na lesa bingila mwaila muzhilo Wanji.

⁸¹ Kijitu pamo, kusapwila pakijilo, kuji meema aya mu kilende, ponka panshi pa mizhazhi ya kinchi, ne kwikala popa poso lusanguko mu kimye kya lutepu. Ke muzhilo wakwa Lesa. Kechi kujipo bujimuku bwakonsha kulengela aa meema akinchi kuya panshi ne; kechi mwakonsha kwi andosamo ne, kechi mwakonsha kwi akokamo ne. Kechi kujipo jishinda ja kwi kyubilamo bulongo kukila Lesa byo oba ne. Lesa uji na jishinda jalumbuluka. Nanchi inge jibula japonako, nanchi Aye utuma meema a kinchi kuya mu kilende na kufyama. Nobe byaambile Yoba, “Mfyai mu kilende poso bukaji Bwenu bwapita.” Mwamona? Aye panshi popa mambo ke muzhilo wa bilengwa na lesa, kimye kya mashika kasa kikyengye kwiya. Talai ku mabula pakino kimye atatula kupona. Kika? Ke muzhilo wa bilengwa na lesa.

⁸² Mambata akapwila pamo, jonse mwiabo, ne kuzhokoloka ntangi. Monka mwa bakonsha kuyuka mu musango umo, Amiwa kechi nayuka byo booba ne, bino bayuka mba awa mucheche wayuwe musango ye ntangi. Kabiji awa mulunda mucheche, bonse bapwilakena pamo ne kuzhokoloka ntangi wabo, ne kutumbuka mulwelele. Kabiji aye . . . kechi ufumapo pa kyokya kizhiba ne, bino aye wakonsha kuya ku Louisiana nangwa ku Texas byonka byo akonsha kuya, ku bujimi bwa laishi. Monai, kasa bakyangye kutumba, kusha muzhi wabo mo basemenwa yewa mwaka, bakwatakana pamo. Amena! Abyo byokiji; nakuzhokoloka ntangi wabo.

⁸³ Lukatazho lujipo ke luno, na muntu, aye kechi uyuka ntangi wanji ne. Ee, mwane. Abo bazhokoloka dinominesheni, abo bazhokoloka bishopu nangwa muntu, bino kechi bakonsha kuzhokoloka Ntangi ne, aye Mupashi Wazhila mu Kyambo. Mwamona? Baamba mba, “Oo, kyawama, Amiwa naumvwa moyo Nakaya musunya pacheche; Amiwa naumvwa moyo Nakaya mungi.” Ooooo, byo kiji byo! Pano ibyepi aka kajimbata ka kacheche kaambile mba, “Amiwa kechi musango mo alamina mayona anji ne. Amiwa kechi naketekela mba Nkamulondela ne.” Obewa ukafwa na mashika. Obewa ukakwatwa monka

mwa, inge wabula kuya na—na kutumbuka ko bakayangamo. Bikwatakanya abyo bine pamo, kabiji kisemwa byo kyuuba.

⁸⁴ Mashipi ekwatakanya ao ene pamo, be bungizha abo bene kuzhokoloka ntangi wabo; booba bintu bimo.

⁸⁵ Bushe mwamona nyuki ya mupulamwa byo iya? Nyuki ikwatakana ayo ine pamo, kasa bakyangye kuviluka, kuzhokoloka inabo wanyuki. Abo ibyo. Kabiji konse koaya, bonse kebalondele ne abo. Ee! Kika kyo booba? Bakwatakana bumupulamwa kasa bakyangye kuviluka. Kyakine; kisemwa kyonse!

⁸⁶ Masabi akwatakana ao ene pamo kimye kya lutepu kasa kikyangye kufika. Amwa mu tulunga tukatampe twameema, mu kebatana; abo babaya. . .byotutela mba “byatunda,” solomoni. Inge baiya kuno, akya kimye kasa kikyangye kufika, mu kebamona mu biumbi bya jikumi, kulupuka mukoka kalunga, kasa biya na kuzhokoloka na kuzhokoloka; meema a mukele, bino kasa baji masabi a mu meema abulamo mukele. Kabiji abo kebeeye konka ku meema abulamo mukele, kuya mu kimye kya kusema make. Baya kokwa na kusema make, pa myaka foolo inge yafika, kabiji babwela bafwa inge basematu. Kabiji bayuka mba babena kuyako na kufwa, kabiji kafwako kyo mwakonsha kuuba pakuuba mba mwibakanye ne. Abo bakiluka masando a masabi kabiji ne bikwabotu, pa kuya kokwa, kasa bayuka mba babena kuya ku lufu lwabo. Pakuuba muzhilo wa bilengwa na lesa wi balengela, byo bayuka mba babena kuya kokwa na kusema mu kimbo, kabiji ne kufwa. Kabiji ne twaana twatucheche tusemwa, kabiji kintu kimo kibakwatakanya pamo nanchi, kabiji balupuka baya ne ku kalunga kakatampe ka meema. Ke kukwatakana! Ke muzhilo. Anweba kechi mwakonsha konauna muzhilo wakwa Lesa ne.

⁸⁷ Byaalo bibena—bibena kwabenamo, pa kino kimye kyo twamona mba—mba bafwainwa kuuba kikyeye. Tuji mu kimye kya kukatazhiwa kwa kyaalo. Twamona byaalo bibena kupwisha bulunda. Mwaka pa mwaka, twatana *kikyeye* kyaalo kasa kibena kutwezhiwa mu komyunizimu; *akye* kibena kutwezhiwa mu komyunizimu. Kabiji monka muno mu kyaalo kyetu, kyashingwa na buki bwa komyunizimu, kabiji kikekalapo na luusa! Monai, kikekyuba, kafwako jishinda ja kwikikayinyamo ne. Kika? Mambotu amo alengejile kubula kukanya Titusa. Bantu bakana Lesa ne Kyambo Kyanji. Ee, mwane, nanchi basa kwikyuba, kabiji ne atweba twikimona mu ndoonda ya kufikizhiwa.

⁸⁸ Amiwa, kimye kyonse, Amiwa senda bimye byabaya; Nafikizha kala pepi nobe mamineti sate, ponkapo. Mwamona? Pakuuba mba tutwezhemo bibye, Amiwa mbena kushijikatu. Anweba katangai inge mwafika ku muzhi.

⁸⁹ Monai, ponkapano babena kukwatakana. Anweba mwaamba mba, “Mulongo Branham, bushe akyo kine?”

Babena kuya ku Kondo ya Alamakindonyi; kyakine byo byo bakoba. Mwamona? Kabiji babena kukwatakana na mambo akyokyo. Oene mambo kyo twaikela na U.N. kabiji ne byonse byo baji nabyo. Abyo Byaalo bya Kumuzhika bibena kukwatakana kwimena Byaalo bya Kumusela, komyunizimu ne bikwobotu, byonse bibena kukwatakana pamo. Bipwilo bibena kukwatakana pamo. Bintu byonse byamweka nobe bibena kukwatakana. Kukwatakana, kukwatakana abo bene pamo, twamona kyokyo.

⁹⁰ Kabiji, kimye akwe konse kukwatakana kwa kyaalo, abye biyukilo, biyukilo bya kyaalo, twamona muno muntanda, bitetanshi mu mampuzha apusanapusana, bintu byapusana bibena kukwatakana; kuleta ntanda pamo, kuleta bantu pamo, bipwilo byonse pamo, byonse bye bintu. Kabiji mu kimye akwe konse kukwatakana byo kubena kubiwa, kuji kukwatakana kukwabo kubena kubiwa. Amena! Akyo kyo Mbena kukeba kwi mubuula anweba pano.

⁹¹ Lesa ubena kukwatakanya Musongwa Wanji. Aye ubena kwiya pamo, kufuma ku Musela ne Kumuzhika, kabiji Kukabeta kabuyeke ne Kabeta kabulenge. Kuji kimye ku kwatakana, kabiji akyo kibena kubiwa ponkapano. Mambo ka Aye kyo abena kukwatakana? Akwa Kushikulwa. Amena! Lesa ubena Kumunengezha. Ee mwane, kukwatakana! Kika kyo Abena kukwatakana nakyo? Na Kyambo! “Pakuuba meulu onse ne ntanda bikapita, pakuuba Kyambo Kyami kechi kikapite ne.” Aye ubena kukwatakana Ayemwine na ABYO BYOBYAAMBWA AYE NKAMBO kechi oene mambo ne nangwa dinominesheni uji yense nangwa muntu mukwabo ambe. Aye ubena kukwatakana Ayemwine. Aye ubena kwinengezha. Kika? Aye ke Musongwa. Abyo ibyo. Kabiji Aye ubena kukwatakana Ayemwine na Musongoshi Wanji, monai, kabiji Musongoshi ke Kyambo. “Mu ntendekelo wajinga Kyambo, ne Kyambo kyajinga na Lesa, kabiji Kyambo kyajinga Lesa. Kabiji akya Kyambo kyamwekele ke muntu ne kwikala wayikele muno mwetu.”

⁹² Kabiji Kipwilo ne Musongwa kabiji ne Kyambo kibena kwikalatu ke umo, poso akya Kyambo Akyokine ke kingile mingilo ya Musongoshi. Amena! Mwikumona nyi? Kukwatakana! Kechi ne jikwabo mba, “Inungaiko ku kipwilo”; kechi ne jikwabo ku *kikye*, pakuuba nyemai kufuma ku bintu byonse ne kwikasa kwi Yesu Kilishitu. Mwamona? Ke kimye kukwatakana. Lesa, kukwatakana na Musongwa Wanji pamo, kumubwezha Aye jibiji; byonka byotu. Kukwatakanya Byambo bya mulaye Wanji.

⁹³ Wabubiji Tesalonika, kyapitala kyabu 2; Kyaamba mba, akye kyapitala kyabu 5 kyaamba mba, “Bazhijikwa balala tulo mu mushiji ba kabuka. Kabiji ne atweba tukasambakana nabo (bomi, ne boba bafwile), tukasambakana kasa tukyangye kufika ne Kokwa ne,” mambo Musongwa ukekala wapwijiika Byo

akafika Kokwa. Aba bomi, aba babena kukwatakana abo bene na Kyambo, kabiji ne booba baya kasa bauba kala kyokyo; kabiji Kyonse kyaiya pamo, ne kulenga kusambakana ku katampe kwa kukwatakana kasa tukyanyge kufika Kokwa. Amena!

⁹⁴ Komyunizimu wafwainwa kufika, abye bintu bikwabo byafwainwa kufika, kabiji ne kipwilo kyafwainwa kukwatakana akyo kine momwa mwiulu, kimye babo... kabiji na byaalo bibena kuya mu Kije kya Bipwilo ya Ntanda yonse; kabiji ne Musongwa wakwatakana Ayemwine na Kyambo kya Lesa. Pakuuba mba kyubiwe byobyoyo, Lesa watuma kiyukilo kya Mwiulu ne bintu bikwabo, akyo kyashinikisha ku Kipwilo, nobe byonka byo Auba ku kyaalo. Amena.

⁹⁵ Lesa; kimye kya kukwatakana! Ee, mwane. Oo, ami! Pano, anweba vulukai amba, ponkapano, kuji kukwatakana kwa Kyambo (kukwatakana jibiji), kubwezha jibiji “Lwitabilo lwa painwe ku bazhijikwa.” Kubwezha jibiji! Amba akye kyakonsha kubiwa mu mujino juba. Kimyetu po kyafwainwa kubiwa ke ponkapano. Kechi kyajingapo na bulwanyi konse kukwabo ne; bafuminemotu kuya ku madinominesheni. Pakuuba pano, kechi kijipo kulubaji lwa madinominesheni ne, mambo ke kimye kya kukwatakana kwa banabalume ne banabakazhi ba mu mitundu yonse, mushobo yense, lufunjisho lonse, bintu byonse monka mwi Kilishitu kupichila mu Lubatizhilo lwa Mupashi Wazhila kabiji ne kubwela ku Kyambo.

⁹⁶ Kimye kya kukwatakana kwa Kipwilo! Oo, ami! Kukwatakananga na Kyambo kyonse akyo kyo bapalang'anya mu matanda onse kututwe tubungwe: kufumatu ku Nikeya, Loma, po baalwile kipwilo kitanshi ke kabungwe, kabiji baalula Luther ke kabungwe, baalwile Wesley ke kabungwe, baalwile bakabungwe bipwilo byonse byashala. Kabiji pakuuba byobyoyo, batatwile kulondela mafunjisho ba bantu, kabiji umvwe Lesa watuma kintu kingi, kechi bakonsha kwi Kitambula ne. Onkao mambo, kechi kya konshekele ne poso ponkapano. Kabiji Lesa walaile, mu moba apelako, amba “Lwitabilo lwa bashabo lukabwezhiwa jibiji ku Musongwa,” amba kikekala muyuwe musango, kabiji kechi kya konshekele kimye kikwabo ne kanatu kyonka kino kimye. Monai kiyukilo kya kufuma Mwiulu, nobe Mumbulungwa wa Mujilo wakobama mukachi ketu, kabiji ne biyukilo ne byakukumya bya kwa Nkambo Yesu Kilishitu. Kabiji Aye byo aamba kwi atweba, kechi Kikakalwa kwikala kyafikijizhiwa monka mo kyaambilwe. Amena! Nanchi twamona po twaimana. Kimye kya kukwatakana!

⁹⁷ Tubena kumona byaalo kasa bibena kukwatakana, tubena ntanda kasa ibena kukwatakana, tubena kumona komyunizimu kasa ibena kukwatakana, tubena kumona bipwilo kasa bibena kukwatakana; kabiji tubena kumona Lesa kukwatakana Aye mwine na Musongwa Wanji, poso Aye ne Kipwilo baikalatu kintu kimo. Aleluya! Nobe pilameda kokwa. Ibyo! Kukwatakana

obe bene pamo; Lesa kukwatakana! Kika? Kechi kyamwekapo kunyuma ne, kufumatu ku nkulo ya kipwilo kitanshi, Mumbulungwa wa Mujilo kechi wamwekelepo mukachi kabantu ne. Kechi kya mwekapo kunyuma ne, kufumatu ku nkulo ya kipwilo kitanshi, po bamwenepo bintu byo tubena kumona leelo. Kabiji akye kyaubiwetu poso Lesa po atumine Tutetesho Tutanu na tubiji kabiji ne kwitupa kiyukilo ku Kikye, kabiji watumine Bamalaika batanu nababiji kufuma Mwiulu; ne kwiya na kubwezha akya Kyambo kyalalang'ene mu madinominesheni, kabiji ne kwikikasa kubwela mu Kyambo kya Lesa jibiji, pakuuba mba alete Mupashi Wanji Wazhila.

⁹⁸ Yesu waambile mba, "Inge mwaikala mwi Amiwa ne Kyambo Kyami mwi anweba, nanchi lombai kyo musaka, ki kemubilwa anweba." Kukwatakanya Musongwa kubwela ku Kyambo, ao ye Lesa. Akya Kipwilo ne Kyambo, kechi Kipwilo ne mafunjisho a bantu ne, Kipwilo ne Kyambo; Musongwa ne Kyambo kukwatakana pamo. Oo, ami! Kyamusango ka... Kubwezha kika? Alwa Lwitabilo lutanshi lwa bashakulu ba kipentekosita, monai, akyo kyalalang'enyne jibumba jakwa Luther. Kechi Luther aye mwine ne; kechi Luther ne, kechi Wesley, kechi booba bakatampe batapile ne. Pakuuba panyuma yakuya kwabo, kwajinga kipwilo kyaimikilwe, kabiji abo... kika kyo baubile nakyo pano, abo balengelema kabungwe mu kikye. Baswile mafunjisho a bantu ne bintutu bikwabo, kabiji byoabyo baile. Kabiji talai pe abo leelo, pano baiya mu Kije kya Bipwilo kya Ntanda yonse.

⁹⁹ Pano, mwamona, pakuuba mu moba apelako, anweba mwamona, twamona bintu kebyubiwe abyo byabujile kubiwapo kunyuma. Monai, ke kiyukilo kya Lesa, kabiji ne kukwe kukwatakana ke kiyukilo kya kimye. Pano, twasaka kutala pa kyokyo bulongo kabiji ne kwikala bashininwa mba twikitambula. Kusha... basha Kyambo kya kine ne kuya ku madinominesheni; ne kutambulako mafunjisho abantu ne milanguluko yapusanako ya bantu mukifulo kya kusendako Kyambo.

¹⁰⁰ Lumwekesho 10 waamba mba, "Mbila Ya malaika wa butanu na bubiji." Pano vulukai, abyo ibyo pa Matolopita Atanu na abiji, kabiji kuji bamalaika batanu na babiji bayimba Matolopita Atanu na abiji. Ako nkotubena kuya kwalondelapo. Bino vulukai kwepi, byonka byo Kyaamba mba, "Yakwa malaika..." kechi Tolopita yakwa malaika wa butanu na bubiji ne, kana "Mbila yakwa malaika wa butanu na bubiji." Monai, kechi malaika wa Tolopita ne, malaika wa Mbila! Monai, malaika aye waimbiletu tolopita, awa malaika wa butanu na bubiji, malaika wa Tolopita. Pakuuba akye kyaamba mba, "Mu moba a Mbila ya malaika wa butanu na bubiji," monai, Mbila yanji byo ikapwa. Monai, aya ke Mbila ya nkulo ya kipwilo. Mu kikye kimye, nanchi aye ukoba...

Mbila, kechi Tolopita ne, kabiji “kyafyamika kya Lesa (ko kuuba mba kyanembwa mu Kyambo) kyafwainwa kupwa.”

¹⁰¹ Pano talai juba ka jo tubena kwikalamo! Talai pa totwa Tutetesho, byo kyalangele akyo Kyambo kya Lesa kyapalang’enamo, byakwa Luther ne bonse bashala, amba aba bakubwezha bintu batangijilepo; baishile babwela ne kwi kimwesho mu Baibolo, kwepi ko bakekala; muntu yense pa kifulo kyanji, kyo akoba ne kikobiwa ku kipwilo; kika kyo akooba, kabiji kika kikamweka ku kipwilo; byonse bye bintu byo ashilepo. kabiji pano, mu juba jikapelo, byo twabujile kuyukapo nangwa kimo ne, kitubujilwe bintu bimo bikamwekanga; kabiji ne mapepala a byambo ne bintutu byasendele, kabiji ne kwiya na kwibisolola ne kukasa pamo byafyamika. Amena! Mulongo, abo bukine bututulu kwi amiwa! Kuuba mba, kwi amiwa, ne kutachika Kyambo pamo. Amena! Amiwa kechi nasakamana ne kika—kika, nangwa, Amiwa kechi natako muchima ku byamba bantu, byo balanguluka, abyo ibyo, pakuuba kwi amiwa ke Bukine.

¹⁰² Nobe bantu ba maana, bafuminenga ku Babilona, babijikile mba, “Uji kwepi Aye, wasemwa Mfumu wa ba Yudeya? Aye uji pantanda, ponkapano. Twafwainwa kumutana Aye.” Abyo iyo. Kabiji Naketekela mba Uji bingi pepi kwiya kya kuuba mba Nakonsha kwamba mba, “Talai, Musongoshi ao wiya! Naumvwa jiji ja pa kachi ka bufuku jabijika!” Amena! Atweba tuji kupelo ya kimye. Oo, ami, kimye kyo tubena kwikalamo. Monai. Mwamona?

¹⁰³ Jaikala juba japusanako! Kimye kyaikala kyapusanako kyo tubena kwikalamo, akye kyafyamika kikatampe kya kwa Lesa kibena kupwa; kuletamo Bulesa, kumwesho musango ye Kyajingamo; atwe tu tubungwe, kabiji twafumamo ne kumulenga Aye *kikye*, kabiji muntu umo Wamulengele *kikye*, kabiji muntu umo Wamulengele *kyokya*. Pakuuba aye Malaika wa Nkambo waishile panshi ne kuleta byonse byalupusano lwabo, kabiji wafumishemo Bukine momwa, ne Kwibupana. Kabiji abyo Byokiji, kyalumbulukatu nobe byo Kyakonsha kwikala, kechi kujipo jishinda jikwabo ja kuyamo ne. Abyo byo Kiji, abyo Aye byoaji. Monai, lukumwa wa muloolo, byonse—byonse bye bintu byapusanapusana abyo byajinga byafyamikile mu bantu. Mwamona? Kyo kika? Aye wajinga na...Akye ke kiyukilo kyakuka? Kwatakeno!

¹⁰⁴ Waamba mba ka Aye mu Malakai 4? Amba ukabwezha! Kubwezha jibiji lwiine Lwitabilo lwa kipentekosito, kubwezha jibiji ku bantu Mbila imotu ya kipentekosito, kiyukilo kya pentekosito kimotu, bukamonyi bumotu bwa kipentekosito, Lesa umotu, bulume Bumotu, lufunjisho lumotu, byonse kasa bijitu pamo, ne kushinikishiwa kwa Mumbulungwa wa Mujilo umotu yeka wafikijile Saulo pa lwendo, lwa kuya ku

Damasakasa uji netu leelo, kasa abena kuuba bintutu bimo Aye byo aubilepo aja juba. Kukwatakana!

¹⁰⁵ Twamona byaalo kasa bibena kukwatakana, tubena kumona ntanda kasa ibena kukwatakana, tubena kumona bipwilo kasa bibena kukwatakana. Twamona Musongwa kasa abena kukwatakana, kukwatakana na Kyambo. Kika? Akyo Kyambo ye Lesa. Kabiji monka Kyambo. . . Nobe Musongoshi (uji Kyambo), kabiji ne Musongwa (byo aji umvwa Kyambo), Beya pamo Mukusambakana. Bakwatakana nobe ku masongola. Monai, Babena kwinengezha mambo a masongola, kabiji Abo—Abo bekala ke Umo. Akyo Kyambo kikala obewa, obewa wikala Kyambo. Yesu waambile mba, “Mu joja juba mu kekiyuka. Byonse byobaji Bataata, Ne amiwa; kabiji byonse Byonji, ne anweba; kabiji byonse byomuji, Ne amiwa. Mu joja juba mukayuka mba Amiwa nji mwi Bataata, Bataata mwi Amiwa, Amiwa mwi anweba, kabiji anweba mwi Amiwa.” Mwamona? Mu “joja juba.” Ng’anyi juba? Jino juba! Twatana mba byafyamika byakama bikatampe bya Lesa bibena kusololwa. Oo, byo Natemwa kyokyo!

¹⁰⁶ Oo, monai saayasi ne Kyambo kechi byakonsha kwesakana pamo ne, nobe byonka byo booba leelo. Kechi be kyubilenga kunyuma ne. Ke ponkapanotu po bakonsha kwikyuba.

¹⁰⁷ Monai, Aye waambile mba, “biyukilo bya mwiulu, biyukilo bya mwiulu.” Saayasi, ne biyukilo bya byaalo; pano baji na biyukilo bikatampe mulwelele leelo, baji na booba baya mwiulu ne bintu byonse. Pano ngaabo bapesapesa bya mwiulu bobaka ku ntanda, ke kiyukilo? Kibaletela moyo. Abo kechi bayuka kimye kyo bakonsha kutuma kintu mwiulu ne kuponesha mambomba, kabiji yakonsha kwikala ke pelesho yetu. Mwamona? Pakino kimye byo biyukilo byo baji nabyo, bileta moyo mwiulu. Mwamona? Baji nabyo, maatomiki mizailo ne bintu byonse, misango yonse ya biyukilo.

¹⁰⁸ Mwamona kobasayijile alwe—alwe lumvwang’ano, juba jikwabo, amba kechi bakavumyapo mambomba aji onse patoka ne, bino babena kuya panshi ya meema kabiji ne mu mushiji, kwibyeseka musangotu umo. Mwamona? Basayina lumvwang’ano, “Atweba kechi tukooba kikyeye ne, inge waamba mba kechi ukekyuba ne (bino twabwela kumuzhi ne kwikyubila mumwe; kasa twayuka mba obewa ubena kuba kintu kimo ko uji kokwa).” Mwamona? Kechi kujipo kintu ne, kijitu. . . kechi mujipo luketekelo mukachi kabo ne, kafwako—kafwako kijiko ne. Mwafwainwa kuuba. . . Mwamona? Kabiji yense uji na moyo wa mukwabo. Akyo ke kiyukilo kya moyo.

¹⁰⁹ Saayasi ne muntu ne byaalo byalenga biyukilo bilenga moyo mulwelele. Abyo kine ibyo. Bino, umo kuchina mukwabo. Kabiji kuji kiyukilo kya mwiulu kyapewa ku. . . Monai pano, baji na kiyukilo kya mwiulu ne akyo, kiyukilo kilenga moyo, muntu

kuya mwiulu; wakonsha kwikala na atomiki mizailo, kabiji wakonsha kuponesha ne konauna kyaalo kyonse. Mwatwela ne kuya mwiulu, kabiji ne kwimana monka. Kechi kujipo kintu nangwa kimo kyakwibakanya kwi kyuba ne. Abo kine bakonsha kwikyuba, abo...kimye kiji kyonse kyo bakonsha kukeba kuuba. Bakonsha kwikileta mu lukungu inge bakeba kuuba, bino...mu mamineti fifitiini kufuma pa kino kimye. Kabiji kyakonsha kuuba mukwabo, ne mukwabo muyewa musango, ne aye. Nanchi, mwamona mba baji na kiyukilo, bino awa musango wa kiyukilo wibaletela moyo.

¹¹⁰ Babena kukwatakana pamo, na kubika bulume bwabo pamo. Ntanda yakasuluka, babena kubika bulume bwabo pamo. Bakomyunizimu babena kubika bulume bwabo pamo na Russia. Muntu yense; bino mukwabo ubena kuchina mukwabo. Mwamona, ke kiyukilo kileta moyo. Abyo ibyo. Abyo ke biyukilo bya kyaalo, kabiji bintu bikwabo.

¹¹¹ Pakuuba Kipwilo kyatambula Kiyukilo kya Mwiulu: kya Kutumbuka! Amena! Yesu Kilishitu, mu musango wa Mumbulungwa wa Mujilo; kuuba mba Aye wajinga mu Lulayang'ano Lwakala, amba Aye wajinga byo Akumenye Saulo mu mukwakwa kokwa ku Damasakasa, Yesu umotu leelo kuno! Kabiji Kyuba byepi? Bushe kileta moyo nyi? Kileta butemwe, kukwatakana kwa umo ne mukwabo. Amena! Lusako lwa umo na mukwabo. Kileta Butemwe bwa Lesa, oo, kwitukwatakanya ne kwituleta, Mubiji wa Kilishitu, mu kukwatakana nobe Musango. Abyo byo kibena kubiwa ponkapano, akwe kusambakana kukatampe ako Lesa... .

¹¹² Babena kukwatakana abo bene, jibumba jimo *papo* mu kulwisha jikwabo, jibumba jimo jiji *kuno* mu kulwisha jikwabo. Kuno kipwilo kyaimana pakachi kaabo; anweba monaitu kika kyakumweka, ki kebakwatakanya nabo. Abyo kine ibyo. Pano, bino, twatana kuuba mba akyo kileta moyo ne kukatazhiwa.

¹¹³ Pakuuba akyo Kipwilo, Musongwa, kyakwatakana na Lesa umo, mu Mupashi umo, ye Mupashi wakwa Lesa, mu Kukwatakana kwazhila kumo kwa Lesa, mu kwikala umo wazhila Musongwa kwi Lesa. Abyo ibyo, bonse pamo; kukwatakana kwa Mubiji. Aye Mubiji ubena kupembelela nobe Musongwa; nobe—nobe byokiji Musongwa, byonka byo twitela atweba bene mba Musongwa. Mambo kimye kya kukwatakana kwa Musongwa, Kipwilo kibena kwiya pamo. Kyafwainwa kulengatu butemwe mukachi ketu, kyakuuba mba kikala kyakosa kwabenamo umo na mukwabo. Abyo ibyo. Inge mwaubatu, anweba kechi mwafwainwa kusashijila bantu kuuba mba balombe ne, anweba kechi mwafwainwa kwibasashijila bantu kuuba mba bapopwele Lesa ne, anweba kechi mwafwainwa kwibasashijila pakuuba mba bobo kyaitabilwa. Abo bajitu na butemwe bwabaya Nanji, kyakuuba mba kechi kujipo kintu kikwabo ne.

114 Mwalanguluka ka payuwe songwakazhi wa mucheche, inetu mucheche walamba bingi, ao ukasongolwa ku mwanamulume ukitwala walamba ye efwalama nanji, kikala na kilumbululo kwi aye kukila bumi bwanji ayemwine, kabiji aye wayuka mba bakesongola? Kabiji aja juba ja masongola byojifwenya pepi, awa mulunda mucheche, Amiwa mbena kwi mubuula, aye “kyanji kwendaukatu.” Mwamona? Aye unengezhatu bintu byonse; aye wipanatu yense kwi aye. Abyo ibyo. Bintu byonse bimusekesha, byo byonka aye byo asaka kuuba. Kyawama, ao ye wafwainwa kwikala musango wa Kipwilo leelo, kyakuuba mba bumi bwetu bwafwainwa kufiwa mwi Lesa kupichila mwi Kilishitu, bwa bikwapo katetesho na Mupashi Wazhila.

115 Kintu Amiwa kyombena kufunjisha kwi anweba kuno, ke kwimubuula anweba bibye biyukilo kabiji ne bintu bikwabo bibena kumweka, Amiwa kechi njipo na kimye kya kwikyuba pankapano ne; kikobiwa mu mbila ikwabo, inge Nkambo waswa. Bino kuji kintu kimo kicheche kyakibula mu Kipwilo. Kabiji tubena kukeba kyokyo, kufika ku kyokyo, kabiji Amiwa njitu kusa kwa kiky kintu. Mwamona? Tubena kukeba kufika ku kyokyo, inge. . . obewa wafwainwa kwikyuba. Inge obewa wabula kwikyuba, byo byonka, obewa wafwainwa kwikyuba. Ku bamona, kimye kya kukwatakana kijitu pepi, mambo Lesa ubena kubungizha Kipwilo pamo kwikala mu—mu Kushikulwa kuya ku masongola kukookwa Kusambakana ku Katampe: kimye Lesa ne muntu po bakakwatakana ku Peenape, mu kimye bilengwa bya mu kimye po bikanungakana na bya mu Peenape.

116 Kyaubiwepo kimye kimo mu musango wa Mwaana muntu patanda. Kabiji Aye wajinga wapaine Bumi Bwanji pakuuba mba alete bulume, bwa kusambakanya bantu bakwabo na bubwe Bulume bumo, mambo a Musongwa wa Yesu Kilishitu. Kabiji pano Kipwilo kibena kukwatakana Akyokine ku Mubiji wa Kilishitu. Kibiika Akyokine kwikala kya kasuluka, kuchibiwako ku minyololo yonse icheche, mu kwinengezha Akyokine; na kwiya pamo, kusambakana mukachi kabo; oo, butemwe ne lusekelo, kabiji ne Mupashi Wazhila kasa abena kwenda mukachi kabo. Oo, ami, kimye ka!

117 Byonka byo tumona mambata kwinengezha, tumona mashipe kwinengezha, tumona lukinyama. . . nyuki na kwinengezha, tubena kumona makumbi kasa abena kwinengezha mambo a mvula, tumona bintu byonse; byo bikwatakana abyo biine pamo, ke kimye kyakushijika ku katampe. Twamona Kipamo kya Byaalo, kya byaalo pamo, kukwatakana abobene mu komyunizimu. Twibamona abo bene kasa babena kukwatakana abobene kuno mu Ntanda Yamuzhika. Twamona kipwilo kasa kibena kukwatakana akyokine pamo, abye byonse bikwabo. Nanchi kechi kyakonsheka ne, kechi kwajingapo kimye kikwabo kya yuwe musango ne; kechi kyafwaijilwe kwikala bibye myaka tweti

yapitapo, kechi yajinga bibye ne. Kechi kyajinga bibye myaka teni yapita kunyuma ne, kyafwainwa kwikala ponkapano. Monai, mambo aye puseno ne bintu bikwabo kechi byafikile pa kikye kifulo ne.

¹¹⁸ Pano bukai! Isukenye obewa mwine, bukiji bukiji, ne kutala kuno kootuji! Tuji kwepi? Nobe booba banabalume bamaana, tujitu mu ndonda ya Kyambo Kyanji, kabiji ne Kyeya kya Nkambo kibena kusaama mu jishinda jetu. Lukumo lwikale kwi Lesa Mwiulu mwine. Kabiji Lukumo lwikale kwi Lesa Witupele Yesu Kilishitu, Aye ye twatemwa, kabiji wituleta pakikye kifulo. Kabiji byo tuji. . . Twi bantu Banji, bapotwa na lupoto lwa Mashi Anji.

¹¹⁹ Oo, ami! Inge kimye kya kukwatakana kyaiya, tubena kumona, kasa tubena kukwatakana umo ne mukwabo mu fungwa ya Mupashi Wanji, atweba. . . Kyakonsha kwikala Mupashi Wanji? Kine, Ke Mupashi Wanji. Kika Akyo? Ke Kyambo Kyanji, kabiji Aye ye. . . awa ye Mupashi wa Kyambo. Kabiji umvwe awa Mupashi wa Mulaye waiya pe obewa kabiji ne kushiniikisha ne kwimwisha Ayemwine ponkapano, bushe Ye Mupashi umo? Kyajinga awa Umo wajinga ne Mosesa mu kiselebwa! Wajinga yeka Umo wajinga pe Yesu Kilishitu! Iye Umo wakumenye Saulo mu lwendo lwanji lwakuya ku Damasakasa! Aye ujitu pamo keesha, leelo, ne myaka yonse! Kabiji Aye ubena kubatu bintu bimo!

¹²⁰ Kabiji tubena kumona byaalo pamo, twamona bipwilo kuyila pamo, twamona komyunizimu pamo, tubena kumona byalupusano kukwatakana, tubena kumona byonse bye bintu; kabiji pano tubena kumona Musongwa kukwatakana na Kyambo. Oo, ami! Ke kimye akyo bazhijikwa po bakasanguka ne kusambakana na booba baji na bumi, ne kuya na kukwatakana ne Yesu Kilishitu kuya ku Peenape.

¹²¹ Lekai Lesa etukwashe, muntu yense, kukwatakana ne Kilishitu bufuku buno, tupane byetu byonse byo tuji, bintu byonse byo uji nabyo, mweo wetu yense, mubiji, ne milanguluko, kwi Yesu Kilishitu, kabiji ne kukeba kimye kya kookwa kukwatakana.

Mbunge ya kwa Lesa byo ikavuma, ne byonse
bikapita,
Ne lukeelo lukafika ke Peenape, lwawama ne
kutota;
Bafwila mwi Kilishitu bakasanguka ne
kupwila pamo kubushiya, (na Musongwa
ukatanwa na bumi, ne kushikulwa pamo.)

¹²² Monai kokwa kukwatakana! Lesa kukwatakanya Kipwilo na Kyambo Kyanji, Kyambo na Kipwilo, pakuuba mba bonse bekale kintu kimo, "Ambai *kikye*, kabiji kikamweka. Ubai *kikye*,

kabiji kikamweka. Akye ikyo; awe ye Amiwa kumeso enu, awe ye Amiwa ubena kwikishinikisha; awe ye Amiwa.” Kijitu bulongo.

¹²³ Twatana kuuba mba kimye kikafika Tolopita po ikavuma, kabiji ne boba balala bazhijikwa kunyuma kokwa, abo kechi bakonsha kulumbuluka kwakubula atweba ne; abo baketekela mwi atweba (Bahebelu 11); kabiji byo bakapwila pamo, bakakwatakana pamo na bomi. Akyo Kipwilo kukwatakana na Kyambo, nanchi Kipwilo ne Kyambo kukwatakana pamo, kwiya kwikala ke umo. Bazhijikwa bafwa na bazhijikwa bomi kukwatakana pamo kuuba mba bekale ke umo; kabiji bonse kuyila pamo na kukwatakana ne Kilishitu kokwa, ku Kijilo kya Masongola kya Mwanamukoko.

¹²⁴ Ke kimye kya kukwatakana, kabiji ne biyukilo bibena kutumbuka konse konse. Biyukilo biji mu byaalo, biyukilo biji mu komyunizimu, biyukilo mu Ntanda ya Muzhika, biyukilo mu Kije kya Bipwilo. Kabiji Kiyukilo kiji muno bufuku buno Mupashi Wazhila kasa abena kutangijila, kabiji Kyambo kya Lesa kibena kwikishinikisha ne kwikilengela kwikala Bukine. Amena! Kimye kyakukwatakana! Kiyukilo kya Kimye kya Kukwatakana!

Twayai tukunyiike mitwe yetu.

¹²⁵ Nkambo Yesu, muchima wami wa bukumulanda ubena kukilauka na lusekelo, byo Namona kukonsha kwami, muntu uji na myaka-yapakachi, bino nangwa byokabyo, kukonsheka kwami kwa kwimumona Anweba kwiya mu kino kisemi; kwikala na bumi ne kwimana pano, kabiji ne kumona aya Ntolopita byo ikajila, “Aye uji mu bubu, muleke obenga. Aye waoloka, ekale waoloka. Aye wazhila, muleke ekale wazhila.” Anweba Nkambo Lesa!

¹²⁶ Kabiji pa kulanguluka atweba kasa twaimana, mu kakimye kacheche, nobe kukopa kwajiso, kimye bapano pantanda po bakabula kuyuka kibena kubiwa ne, pakuuba ponkapotu, mukamona kwamweka ku meso enu, batemwe bene baya kala, baiya na kukwatakana ne anweba jibiji. Kabiji tukululwa mu kakimyetu kacheche, nobe kukopa kwa jiso; kabiji ne kushikulwa, pamo, mu kusambakana Nkambo yetu mulwelele. Kabiji ne kukwatakana Nanji, ne kwikala konka myaka ne myaka, kabiji kechi kukekala kufumako ku Kyeenyi Kyanji jibiji ne.

¹²⁷ Ke kintu kikatampe bingi leelo, Nkambo, kuyuka mba ponkapano twakwatakana na Mupashi umo. Mupashi Umo, aye Mupashi Wazhila, uji na Kyambo mu maboko Anji, wiya mwi atweba. Kabiji ke kintu kikatampe bingi, ke jishuko jikatampe bingi pa kuchibiwako ku ntanda, ne kukwatakana atweba bene kwi Yesu Kilishitu. Kabiji ne kulanguluka mba juba jimo, mu musango wa ku mubiji, na mubiji wapasha nobe Wanji Mwine mubiji walukumo, tukekala panshi ku tebulu ku

Kijilo kya Masongola ne kwikala kokwa kasa twakwatakana kabiji ne kutwela Nanji mu masongola; ne kwikala Musongwa ne Musongoshi mu bimye byonse bikeya, monka mu Peenape ubula kupwa.

¹²⁸ Nkambo Lesa, lekai kikye kechi kikaletu milanguluko ya kufwanyikizha ku bantu ne, bino lekai kikale bukine poso zala ne kilaka bikale mu bantu bakoobe. . . kasa batanga bipepala byabo bya majashi, na kutala pa. . . ne kuteleka ku waileshi ne majashi abyambo, kabiji ne pakumona mba ke kimye kya kukwatakana. Biyukilo bibena kubesha.

¹²⁹ Nkambo Lesa, nobe byo twajikwamba pa banabakazhi, bintu byo bakooba mu moba akupelo; kipwilo byo kikooba mu moba akupelo; kabiji ne ma Nkulo a Bipwilo byo akekala, kabiji ne Tutetesho byo tukekala, ne bibye bintu bikwabo. Kabiji twamona byonka byokyajinga, mu moba akwa Nowa. Twamona byonka byo kyajinga, mu moba a Sodoma ne Lota, kimye awa Malaika wa Lesa byo emwesheshe Ayemwine mu bumuntu, ao wajile nyama ya ng'ombe ne kutoma mukaka wafuma ku ng'ombe, ne kuja shinkwa; kabiji waimene byobya ne kubuulang'ana bya ubiwenga kunyuma Yanji. Kabiji Yesu waambile mba kintutu kimo kikobiwa pa kwiya kwa Mwaana muntu.

¹³⁰ Nkambo Lesa, twamwene pilamenda, byo twiishimikile kookwa, kabiji ne kumona byo twanungilengapo bibye bintu; kabiji twatana kuuba mba tuji mu kimye-kyakupelo, kupembelela Jibwe ja Jikoka. Lukumo lwikale kwi Lesa! Twalomba, Taata, mba Anweba musa kubusha, bukiji bukiji pano, kabiji ne kwitubungizha pamo, na butemwe bwa bulesa ne mushingi kwi Yesu Kilishitu ne ku umo ne mukwabo.

¹³¹ Inge kuji bamo muno bufuku buno abo babula lolo luketekelo kwikala mwi abo, mwakonsha kusutulako kuboko kwenu kwi Lesa ne kwamba mba, “Nkambo Lesa, kwatakanyai ami ne Anweba, kwatakanyai ami ne Anweba”? Lesa akupeshe, mulongo. Lesa akupeshe, ne obewa, obewa; ee. “Kwatakanyai ami ne Anweba, Nkambo.” Ee! Oo, ami!

Byaalo bibena kwabana, Isalela ubena
kubuka,

¹³² Talai kwi Isalela kokwa, kukwatakana pano. Isalela, kufuma pantanda ponse, waiya na kukwatakana pamo ayemwine; na kukwatakana abo bene kabiji pano ke kyaalo. Abo ke kyaalo kyakwatakana: baji na mbandela yabo, mali abo, mazhita abo, bintu byonse; inge kwajingapo kala, byobaji ponkapano. Isalela wakwatakana, Loma wakwatakana, kipwilo kya kwatakana. Kabiji ne Musongwa ubena kukwatakana, amena; kabiji ne kwiya pamo kwa Kusambakana Kukatampe. Kyo kika? Byonse bibena kwenda kuya ku Kiyukilo, akya Kiyukilo kine

kikatampe, Yesu ne Musongwa Wanji kukwatakana pamo nobe umo.

¹³³ Lesa Taata, swishai ao mapesho o Mbena kwipwizha babo bantu, kabiji lekai tukwatakane kwi Anweba mu muchima ne ku mupashi, byo babena kusutula maboko abo, kasa babena kukebesha kyokyo. Nkambo Lesa, tutokeshai ne kwitulenga kwikala Benu; kiswishai, Nkambo. Abyo byo byonka byo twayuka kabiji ne kuuba, ke kwipuzha. Kabiji pano Anweba mwaambile mba inge twikipuzha ne kwikiketekela, twafwainwa kwikitambula; Amiwa mbena kwikipembelela, Nkambo. Amiwa ne musanchila Anweba mu Jizhina ja Yesu Kilishitu. Amena.

Namutemwa Aye, Namutemwa Aye,
Mambo Ye wajinga mutanshi kutemwa,
Kabiji wapotele lupulukilo lwami
Pa Kalvali pa kinchi.

Amena. Oo, ami!

Talai, Musongoshi ubena kwiya!
Naumvwa lwito lwa pakachi kabufuku!
Tukaya mwiulu na kubijika, inge atweba bonse
twakwachisha,
Ne Kumukumanya mulwelele.

Labainga ne kulomba, mulongo wami,
Kuchina nangwa umo wakasenda muchinya
obe,
Mambo wabu kyambazhi ne wabwela
panyuma
Kechi bamvwala mukangyo ne.

¹³⁴ Abyo ibyo. Twayai twinengezhe ku lwito lwa pakachi kabufuku. Lubena kwiya mu kimye kyo mwabujila kulanguluka. Kukekala kubijika, kechi kubabula lwitabilo ne; kikekala kya bufyafya. Kana baitabila, abo babena kupembelela kikye: Mubena kumona tubaangabanga kwiya pamo mu mulaini? Mwamona? Mwalupukile ng'anyi kintu? Byonkatu byo kyaubiwe kimye kitanshi. Monai, pano po tuji, biyukilo bibena kwiya.

Twamona biyukilo bya Kwiya Kwanji kwa
mapesho ke kumweke,
Monai, talai mabula akinchi kya mukuyu a
bena kwaluka ke mazhamatamba;
Mamboawama a Bufumu afika mu kyaalo
kyonse;
Kabiji tuji peepi, mpelo ibena kumweka.
Nanchi nalusekelo, kuya, tukasekelela Mbila
ya mapesho a kumweka Kwanji,

¹³⁵ Abyo ibyo nyi? Oo, “Kusekelela Mbila ya mapesho a kumweka Kwanji!” Abyo byotwafwainwa kuuba. Bulai muntu yense, “Inengezhai, nengezhai ku kumanya Lesa.” Amena!

Amiwa na Mutemwa. Oo, byo Namutemwa Aye. Pano, twayai twimane. Byo tubena kwishajikapo umo ne mukwabo, yai ku bonse ne kwiimunapo na muntu umo, ne kwamba mba:

Poso byo tukakumana!

Iyimunai mu maboko, pano.

. . . poso byo tukakumana!

Poso byo tukakumana kumaulu akwa Yesu;

Poso byo . . .

Vulukai, mwakonsha kwikala na lwito, kusambakana kwetu kukwabo kape kukekala ku maulu Anji.

Oo, Lesa ekale ne anweba poso byo tukakumana jibiji!

¹³⁶ Pano, ngi langulukaitu, kasa tukyangye kukumana jibiji; kasa tungye kukumana pa Mulungu lukeelo, nangwa Pakisatu bufuku, kyafwainwa kwikala byobyo. . . kintu kitanshi mwayukatu, muntu umo wazhimang'anatu. Awe wazhimang'anatu, kabiji baya. Oo, kulanguluka balume benu bazhimang'antu, nangwa bakazhi bene bazhimang'anatu, kabiji—kabiji ne bamuka Yoano bazhimang'anatu, kabiji—kabiji—kabiji kukwe banyike bazhimang'anatu. Byonse byamwekele (kika kyamwekele?), apo nishi washala kunyuma!

Oo, kukekala kujila ne kwisuma kumeno
Balubilamo byo bakabulwa mambo abo;
Bajijile ku mabwe ne ku mitumba, (Nobe
Isalela, pa kubwela mu muzhi, ku zubo
yazhila.)

Balombele pakuuba milombelo yabo yajinga
yakelwa. (Abo bakaine Mbila.)

¹³⁷ Oo, mulongo, kechi wakonsha kuuba kyokyo ne. Kyonse kyo wakonsha kuuba, imana wakosa ku mwingilo! Ee, mwane!

¹³⁸ Pano, poso tukakumane, tukoba kikye:

Yanga Najo ja kwa Yesu,
Jikakupokolola ku byonse;
Umwwe meseko akuzhokoloka, (Wakonsha
kuuba byepi?)
Lomba wijitele aja Jizhina Jazhila.

Jizhina byo Jawama, Byo janemesha!
Luketekelo lwa ntanda ne lusekelo lwa
Mwiulu;
Jizhina byo Jawama, Byo janemesha!
Luketekelo lwa ntanda ne lusekelo lwa
Mwiulu.

¹³⁹ Twayai tukunyike mitwe yetu, byo tubena kunyinyita:

Pa Jizhina ja Yesu nakufukama,
 Kupona kikuvumene ku maulu Anji,
 Mfumu wa mfumu mwi Mwiulu...
 mumvwikai Aye,
 Kimye lweendo lwetu byo lukapwa. (Byo
 kikekala, juba jimo.)

Oo Jizhina jawama, (Jawama Jizhina!) Byo
 jawamisha!

Poso byo tukamonang'ana jibiji, Lesa ekale ne anweba.
 Luketekelo lwa ntanda ne lusekelo lwa
 Mwiulu;
 Jizhina Jawama, Oo jawamisha! (Byo
 jawamisha!)
 Luketekelo lwa ntanda ne lusekelo lwa
 Mwiulu.



KIMYE KYA KUKWATAKANA NE KIYUKILO KDE63-0818

(The Uniting Time And Sign)

Ino Mbila na Mulongo William Marrion Branham, yalupwilwe patanshi mu Kizungu Pamulungu mabaanga, Kasalakanduba 18, 1963, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org